

KOPI MO FAASAOSAOGA TALAFEAGAI A SUI USUFONO

ASO TOFI, 22 MATI 2018

Na nofoia le Nofoa e le Fofoga Fetalai i le itula e 9:00 i le taeao.

Tatalo.

SAUNOAGA FAAFEILOAI A LE FOFOGA FETALAI

FOFOGA FETALAI: Ou te faasilasila atu ua toe amatalia Tualumaga ma Galuega a le Fono Aoaofa Fofoga Fetalai.

MALELEGA MAI LE AO O LE MALO

Na fofogaina e le Fofoga Fetalai le Malelega mai Lana Afioga Mamalu, O Le Ao o le Malo.

“TUSI mo:

Le Fofoga Fetalai:

E tusa ai ma le Mataupu 59 o le Faavae o le Malo Tutoatasi o Samoa, ua ou tuuina atu nei le maliuga i le Fono Aoaofa Fofoga Fetalai na te iloiloaina ai le Tulafono Tau Faaofi ua faaalua i nei:

1. Tulafono Tau Faaofi o Teuteuga o le Tulafono o Fua Faatatau o Lafoga o Oloa Gaosia i le Atunuu (Nu.2) 2018.
2. Tulafono Tau Faaofi o Teuteuga o le Tulafono o le Faasologa o Tiute 2018.

TUUIINA ATU i lou nei Lima i lenei aso 21 o Mati 2018.

(Sainia): **Tuimalealiifano Vaaletoa Sualauvi II**
OLE AO O LE MALO.”

FAASILASILAGA MAI LE TAITAI O LE MAOTA

Na fofogaina e le Fofoga Fetalai le Faasilasilaga mai le Taitai o le Maota.

E tusa ai ma le Tulafono Tumau 100(2), ua tuuina atu nei le Faaaliga i le Fono Aoao Faitulafono mo le iloiloina o Tulafono Tau Faaofi ua taua i lalo i lona Tulaga Faanatinati.

1. Tulafono Tau Faaofi o Teuteuga o le Tulafono o Fua Faatatau o Lafoga o Oloa Gaosia i le Atunuu (Nu.2) 2018.
2. Tulafono Tau Faaofi o Teuteuga o le Tulafono o le Faasologa o Tiute 2018.

TUUINA ATU i lenei aso 21 o Mati i le tausaga 2018.

(Sainia): Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi
TAITAI O LE MAOTA.

SAUNOAGA FAAFEILOAI A LE FOFOGA FETALAI

FOFOGA FETALAI: Malo le soifua malo le lagi e mama i lenei taeao fou i le paia o le Palemene aemaise foi o Faauluuluga o Matagaluega a le Malo, ae a le tapuaiga a Samoa.

TULAFONO TAU FAAOFI O TEUTEUGA O LE TULAFONO O LE PUIPUIGA MAI AAFIAGA O LE TAPAA 2018 – faitauga faalua

Afioga Hon TUITAMA TALALELEI TUITAMA (Minisita mo le Soifua Maloloina): Lau Afioga i le Fofoga Fetalai e talitonu o lea tu mai lagi le lagaali a Tamafaiga aua le usuai foi o lau Afioga ma le mamalu o lenei Maota i le toe faaauauina o felafolafoaiga i luga o Tulafono Tau Faaofi mo lenei foi aso. E momoli atu le agaga faafetai ma e faaopoopo foi i le taulaga molia i le alofa ma le agalelei o le Silisili Ese.

Ae ua tulai atu lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Puipuiga mai Aafiaga o le Tapaa 2018 i lona faitauga faalua, ma ou te fia tautala faamalamalama i ai.*

Faaluaaina e le Minisita mo Galuega, Felauaiga ma Atinae Eseeese ma le Minisita mo Pisinisi, Alamanuia ma Leipa.

FOFOGA FETALAI: E tapa ma le faaaloalo lau Afioga i le Minisita mo le Soifua Maloloina e malele ma saunoa.

Afioga Hon TUITAMA TALALELEI TUITAMA: Lau Afioga i le Fofoga Fetalai e laitiiti lava lenei Tulafono Tau Faaofi Teuteu ua tapenaina ona ua tatau foi ma ua alagatau ma ua talafeagai foi ma lenei vaitau ona toe silasila lea i nai Teuteuga ina ia ogatusa ma le soifuaga ua i ai nei le soifuaga i lenei vaitau.

I sona vaaiga lautele lau Afioga i le Fofoga Fetalai ma le mamalu o le Fonotaga, o le Tulafono o Puipuiga Mai i Aafiaga o le Tapaa 2008, o lo o faavae i luga o le Feagaiga Faava o Malo, lea e taua nei o le Framework Convention of Tobacco Control po o le FCTC, sa sainilima ai le tatou atunuu i le tausaga e 2003 ia ma o lea na faamamaluina i le tausaga e 2005.

O lea Feagaiga Faava o Malo lau Afioga i le Fofoga Fetalai, o se treaty i lalo o le faamalumaluga o le Faalapotopotoga o le Soifua Maloloina o le Lalolagi po o le World Health Organisation o lo o faapuupuua i le WHO. Ma o se feagaiga foi ua taua i totonu o le Sustainable Development Goals aemaise lava o le SDG3A o le vaega o le soifua maloloina. O se taimi muamua lea ua faia ai se Teuteuga i le Tulafono o Puipuiga Mai le Aafiaga o le Tapaa 2008, ua tusa ma le sefulu tausaga talu ai ona toe iloilo lea Tulafono. E lua la ni vaega o lo o faamamafa i ai lenei Teuteuga, o le vaega muamua, ia o le taumafai lea e ala i lenei Tulafono ona ausia vaega o le Feagaiga Faava o Malo po o lea na ou taua o le FCTC or Framework Convention of Tobacco Control.

O lona lua, o le faia lea o laisene mo le faatauina atu o oloa tau tapaa. E fitu la ia ni fuaiupu o le Tulafono ua faia i ai le Teuteuga, ma o le vaega tele o le Teuteuga, o le faia lea o laisene mo le faatauina atu o oloa tau tapaa Tobacco Licensee. O le Teuteuga muamua la lau Afioga i le Fofoga Fetalai ma le mamalu o lenei Fono, o lo o i ai lea i le Fuaiupu e 2 o lo o faamatalaina ai le uiga o upu. Muamua, o le faaupuga o lē e ona le galuega po o le employer, ia aofia ai ma le faaupuga, lē e ona pisinisi tau pasese, po o public transport.

O lona lua, oloa tau tapaa po o tobacco product, ina ia aofia ai ma tapaa faaonaponei, lea e taua electronic cigarettes, ona e le o i ai i totonu o le Tulafono Autu o le 2008 ia ituaiga sikareti a o lea ua aliae mai i onaponei a o le ua agai foi i ai le taumafaiga a i latou e gaosia ia tapaa ma Tobacco Products ia le i ai o nei ituaiga sikareti o lo o ua amata ona faaaogaina e nisi ma e talitonu foi e oo ina faagasolo mai i le tatou atunuu i se taimi e le o mamao. Ua atoa ai ma faaofiina o upu fou po o fuaitau fou i totonu o le Tulafono. O ia fuaitau foi e i ai ia tagata e tufatufaina atu po o distributors pusa sikareti lea o lo o faaperetaniaina o le cartoon, auina mai i totonu import, laisene licence, lē e ona le laisene licensee, Komiti mo le Puipuiga mai Aafiaga o le Tapaa, National Tobacco Control Committee, totogifuapauina prescribed fee, tagata e nofoia nofoaga occupier, kamupani po o pisinisi o oloa tau tapaa tobacco industry. O upu nei, e le o i ai ni faamatalaga i totonu o le tatou Tulafono Autu ma e manomia ina ia aua ne i i ai se feteenaiga ia pe fesiligia faamatalaga o uiga o ia upu, ma o lea la ua tuuina ai i totonu o le Teuteuga lenei o le Tulafono e ala lea i le Tulafono Teuteu e pei ona o lo o tagofia nei e le mamalu o le Fonotaga.

Ua aofia ai foi i lenei Tulafono Teuteu le Teuteuga o le Fuaiupu e 7, ua faaofiina ai i totonu le Fuaiupu 7A, ina ia faavae ai se Komiti mo le Puipuiga Mai Aafiaga o le Tapaa National Tobacco Control Committee. O lo o i ai ma galuega tauave a lenei Komiti, ia o sui o Matagaluega ma Faalapotopotoga eseese a le Malo lea o lo o faapea foi ma Faalapotopotoga Tumaoti o lo o aofia ai i totonu o lenei Komiti, o lo o i ai foi ma aiaiga o lenei Komiti e pei ona manaomia le toavalu o sui o le Komiti nei e agavaa ai e faatinoina se fonotaga,

e tatau ona fono faafa i le tausaga, ma e tatau ona aumaia le lipoti ma lipoti mai le Komiti lenei i le Minisita o le Soifua Maloloina i quarterly periods po o tai kuata tausaga e ogatasi la ma le fuafuaga lea i a latou fonotaga e tatau ona faafa i le tausaga.

O lo o i ai foi i lenei Teuteuga, le Teuteuga o le Fuaiupu 18, o le 18 o le soloia o le Fuaiupu 18(1)(a) o le Tulafono e tusa ma le vaega 13 o le Feagaiga Faava o Malo po o le Framework Convention on Tobacco Control. O lea vaega o le FTCT ia o lo o taua ai e faapea, no advertising sponsorship and gets in relation to tobacco products and the tobacco industry. O le aveesea lea o faalauiloa o pusa tioata o oloa tau tapaa o lo o i totonu o faleoloa i le taimi nei. O le tatou Tulafono i le taimi nei, o lo o aiaia ai le faasaina o ni faasalalauga po o le faalauiloa o le sikareti ae faataga ai ia pusa tioata laiti lea e vaaia i totonu o faleoloa e tuu ai i totonu sikareti e iloa atu lava e tagata faatau. I lalo la o le feagaiga lea FCTC lea na tatou sainia, lea la ua toe fai ai le suiga lea e teuteu ai le tatou Tulafono, ina ia aua ai ne i faailoaina le sikareti ma aveesea ai la ia le pusa lea e masani ona tuu ai sikareti i totonu ia aua ne i iloa atu e tagata faatau aemaise foi o a tatou fanau laiti.

O le Teuteuga o le Fuaiupu 21, o le a soloia ai le fuaiupu 21(3) o le Tulafono e tusa ai ma le vaega 13 o le Feagaiga Faava o Malo po o le Framework Convention of Tobacco Control lea na ou tolaulauina atu i le faaperetania. O le aveesea lea o tau pau mo se fefaatauaiga masani po o tupe toe faafoi masani tau fefaatauaiga, lea e tau o normal trade discount and rebates. O oloa ia tau tapaa ona e faasa ona faia ni faalauiloa po o promotional discounts i oloa tau tapaa e tusa ai ma le Feagaiga Faava o Malo lea ua uma ona tatou sainia.

O lo o i ai foi le Teuteuga lau Afioga i le Fofoga Fetalai i le Fuaiupu 23, o le faaofiina o le Fuaiupu 23A ina ia faasaina ai le tagata e i lalo ifo o le 21 tausaga le matua ona ia faatauina atu ia le sikareti le tapaa ia po o tobacco products. O le tatou Tulafono o lo o i ai nei, o lo o faasaina ai le faatauina mai e se tamaitiiti e i lalo ifo o le 21 tausaga se sikareti mai se faleoloa, ae le o faasaina le faatauoloa, e le o aiaia ai tausaga o le o lo o faatauoloa. O le suiga la lea o le Tulafono po o le Teuteuina, e le gata e le mafai e i latou e 21 tausaga po o lalo ifo ona faatau mai sikareti ae ua puipuia ai foi ma le faasaina o i latou e latou te faatauina atu po o le faatauoloa ia aua ne i lalo ifo o le 21 tausaga. E le o lavea ai ia le faatauoloa lea e 21 tausaga i le Tulafono o lo o i ai nei ae o lea la ua fai le Teuteuga lea ina ia faamalosi ai ia lena tulaga.

Ua teuteuina foi le Fuaiupu 24 lau Afioga i le Fofoga Fetalai, i le faaofiina lea i totonu o le Fuaiupu 24 (2a) ina ia mafai e le Faatonu Sili ona faatonuina le mamafa ma le tele o le sikareti po o sikareti taitasi i totonu o se pepa sikareti e mafai ona faatauina atu.

O le taimi nei, ia ua popoto foi ia fale gaosi sikareti e gaosi tapaa e faalapotopoa a latou sikareti ina ia faafaigofie ai ona taulia pe alumia ai ia latou sikareti. Ae o le aiaiga la lea e i lalo o le Tulafono, o le a tutusa uma ai lava sikareti, e tatau ona i totonu po o sikareti taitasi e faatauina atu le lapopoa e faapea foi ma le latou mamafa.

Lau Afioga i le Fofoga Fetalai, o lo o i ai foi le teuteuga i le Fuaiupu e 29. O le isi teuteuga o le faaofiina i totonu o le fuaiupu 29(a) ina ia mafai ai ona fai suesuega po o shadow testing, o oloa tau tapaa ae e totogi lava e le fale gaosi tapaa ia ia suesuega. E siaki ai foi po o faamaoni lipoti o lo o tuuina mai i le Matagaluega i tausaga taitasi.

O lo o i ai foi le teuteuga i le vaega 5(a), lea e aiaia ai le laiseneina o le faatauina atu o oloa tau tapaa, o le faaofiina o fuaiupu....

Tofa Lealailepule Rimoni Aiafi (Faleata Sisifo): Lau Afioga i le Fofoga Fetalai....

FOFOGA FETALAI: Se i malie lau Afioga i le Minisita, se i tulai mai ia le faauilavea la e.... se i fai atu muamua le fautuaga a le Nofoa, o lea tatou te le i see atu i mea taitasi i iloiloga auiliili o le Tulafono, ia ona faapena lea ona saunoa i mea taitasi lau Afioga, ae manatu i itu aoga itu taua o le Tulafono ona o le manatu i le tatou galuega, ae ui i lea se i tuu atu le avanoa i le sui usufono o Faleata Sisifo.

Tofa Lealailepule Rimoni Aiafi: Ia faafetai i lau Afioga o le ala foi lea o le tulai atu i le Afioga i le Minisita. Pei lava ona silafia, na fai atoa lenei mea nei i le Aso Gafua i le tatou workshop a lailoa le Afioga lea ua tatou malamalama, ae tuu mai se avanoa se i fai atu ai ni nai fesili pe a tusa ai ma le finagalo ma le faaaloalo faafetai.

FOFOGA FETALAI: Ia, pei e faapena se lagona o le Nofoa e faamalulu atu, sa faamanino e le Pule Sili ia le tulaga o le mataupu lea, ae leai foi se malosi o le Nofoa e taofi ai lou finagalo e toe faamalamalama ia ae fua i le tatou taimi. Se i tulai mai lau Afioga.

Afioga Hon TUITAMA TALALELEI TUITAMA: Lau Afioga i le Fofoga Fetalai, ia, afai o le lagona lea o le Maota, ia ua maea foi la ia se.... faafetai tele, ia o le teuteuga lena lau Afioga o le Tulafono ma le faaaloalo.

FOFOGA FETALAI: Ia, o le galuega lava e fua foi i le fesoasoani a le Malo ina ia faafaigofie le tatou galuega.

Tofa AUMUA ISAIA LAMEKO (Falealili Sisifo): Lau Afioga i le Fofoga Fetalai...

FOFOGA FETALAI: Ia, se i tulai mai ia le sui usufono mo Falealili Sisifo.

Tofa AUMUA ISAIA LAMEKO: Faafetai i lau Afioga i le Fofoga Fetalai mo le avanoa i lenei taeao. Faafetai foi i le alofa ma le agalelei o le Atua ua taitaiina mai lo outou soifua ma si ou ola i lenei taeao.

E puupuu lava se manatu e faatatau i lenei Tulafono Tau Faaofi o Teuteuga o le Tulafono o Puipuiga Mai Aafiaga o le Tapaa 2018. O le vaega muamua lau Afioga, e na o se tuualalo lau Afioga i le Minisita ma le Matagaluega, e faatatau lea i le Komiti o le Malo i puipuiga i aafiaga o le tapaa. E le o i ai se sui o le Faalapotopotoga o le au Gaosi Oloa i totonu o le... ia manatua foi o le tatou tapaa lea, e gaosi i totonu o Samoa, e lua ia tatou fale gaosi tapaa o lo o i ai. E fautuaina le i ai foi le sui o Faalapotopotoga o Pisinisi le Samoa Chamber of Commerce, aua o tulaga tau pisinisi.

O le vaega lona lua lau Afioga i le Fofoga Fetalai, o lo o taua i le teuteuga lenei ia le aveesea o le Fuaiupu lea 21(3). Atonu mo le silafia e le Matagaluega o le tele o le aafiaga o le vaega lenei 21(3), ona o le Tulafono tuai, lea sa

faatagaina ai le tuuina atu o rebates po o discounts i ai latou, latou te tufatufaina atu le tapaa.

I lau sailiiliga sa fai, ua mautinoa ai, e tele le aafiaga i tagata faigaluega o lo o faafaigaluegaina i lalo o le vaega lea. I le taimi nei, e lua a tatou vaega distributors lea o tagata latou te tufatufaina tapaa i Upolu, lua Savaii. Ae i totonu o kamupani ia, o lo o faafaigaluega ai foi ia tagata e o e tufa tapaa, lea la e mafua ai ona i ai le rebate lea po o le discount lea e faaogaina e tologiina ai tagata nei. Ma o lau tuualalo la i lau Afioga i le Minisita, se i toe silasila ifo i le vaega lea, o le a le toe maua ai se tupe maua a ia tagata o si o tatou atunuu. O le a mafai foi ona aveese ai e le vaega lenei o le Tulafono ia le tulaga o le faafaigaluegaina o tagata.

O le vaega lona lua lau Afioga i le Minisita, se i toe silasila lava i le laisene lea na tuuina atu i le fale tapaa. E pei lava o lea sa taua foi i le taimi sa faatalanoa ai lenei Tulafono, e tai tausaga ma tuuina atu le laisene. Ia ae o lo o aumai se faataitaiga pe a ma se ½miliona le tau o le laisene e tasi. Ia pe le mafai ona silasila, tagai ane pe tai lua tausaga ma ave i ai le laisene, ia e pei o nai manatu ia i lenei taeao, manuia lau Afioga i le Fofoga Fetalai, faafetai.

FOFOGA FETALAI: Malo...

Tofa Hon LAUOFO FONOTOE NUAFESILI PIERRE LAUOFO (Anoamaa Sisifo): Lau Afioga i le Fofoga Fetalai, se avanoa puupuu.

FOFOGA FETALAI: Se i tulai mai le sui usufono o Anoamaa Sisifo.

Tofa Hon LAUOFO FONOTOE NUAFESILI PIERRE LAUOFO: Faafetai mo le avanoa, ia tatou i ai faatasi ma lau Afioga i le faafetai ua siitia i lenei taeao, i le tatou Tapaau Sili i le lagi. Faamalo folau.

O nai manatu pupuu lau Afioga i le Minisita mo le Soifua Maloloina, ona o lea e maitau atu i le Tulafono o lea e aumai ia... o lea ua tuu i lalo o le uiga o le upu tapaa, ia mea ia o non nicotine delivery systems. E pei e foliga mai foi lele o mo mea o tau ia o tapaa, ae leai ia se nicotine, ae lea pei e maua, o le nicotine lea e mafua ai ona maua le tagata lea e taumafa tapaa i le gasegase e tele lava o le kanesa le gasegase e aafia ai. Ae lea la e maua foi i nai sailiiliga, o mea ia e taumafai foi lele e tagata taumafa tapaa e tuu ai le toe tagofia o le tapaa mo mea o non nicotine delivery systems po o le sao lea? O lea la ou te fesili atu ai i lau Afioga mo se faamalamalamaaga o lea tulaga, ina ne i taofia e le Tulafono ia mea ia, a o mea ia, e fesoasoani i tagata taumafa tapaa e taumafai ia tuu ia le tapaa, aua le toe tagofia le tapaa.

O le isi lau vaega lau Afioga, o laisene ia sa saunoa le sui usufono o Falealili se tasi o sui usufono mai Falealili, i mo mea o laisene tai lua tausaga, ia a o le manatu e silasila foi i ai lau Afioga; Pe i ai se tapulaa o laisene e tuuina atu i tagata o lo o faataua tapaa, latou o lo o gaosia tapaa, ia o latou o lo o faatauina atu le tapaa, ma tulaga faapena. O le a se silasila a lau Afioga ma le Matagaluega, pe tataua ona i ai se tapulaa o laisene? Pe afai lava o lea e tulituliloa le tulaga foi lele ia ausia le manulauti o le Matagaluega, ia tuuifitia ia tatou foi ia ua aafia i gasegase.

Ia la foi ua taua le tulaga o le Komiti lea maitau atu e toasefululima sui o le Komiti, ia e pei foi lea o lea e maitau atu o lo o i ai le Matagaluega o Taaloga, ia ae o lea foi e toe i ai ma le SASNOC, o le Komiti lea po o le Asosi o lo o

vaaia taaloga, ia se i silasila po o ua toatele tele ia le Komiti, ia aua e mafai lava ona fai le fonofono lele, a manaomia logo le Matagaluega po o se Faalapotopotoga e o atu i luma o le Komiti e faaali so latou finagalo e tusa ma se mataupu o lo o tagofia e le Komiti. Ia o tulaga na e pei ona ou tulai atu ai.

Ia ma le fesili mulimuli lau Afioga i le Minisita, ia ua tataua ona i ai ni faamaumauga o le tou Matagaluega, po o le a se tulaga ua oo i ai le fuainumera o latou e taumafa tapaa po o ua tuuaititia i le faatulai mai o lenei Tulafono? Aua o lea ou te tilotilo atu i le Tulafono lenei, ua fai foi sina leva na i ai. Ia po o le tulaga la po o ua tuuaititia latou e taumafa tapaa, i le agaga foi lele i le tuuaititia ai foi latou foi latou e aafia i le gasegase e mafua mai i le taumafa tapaa. Ia e pei o nai motugaaafa na lau Afioga i le Fofoga Fetalai, ae faafetai tele mo le avanoa.

FOFOGA FETALAI: Faafetai, tuu atu le avanoa i le sui usufono o le Itumalo Tu Taulaga Sisifo.

Afioga FAUMUINA ASI PAULI WAYNE FONG (Itumalo Tu Taulaga Sisifo): Faafetai i lau Afioga i le Fofoga Fetalai, afio foi lau Afioga i le Taitai o le Malo i lenei taeao aemaise foi le mamalu o le Kapeneta ma le latou vaega, ae puupuu lava se manatu lau Afioga i le Fofoga Fetalai. Ou te tulai atu o le aotelega o le Tulafono o lo o taumafai atu i ai, aemaise lava le tulaga lea o le factory compliance. O fale o lo o faatino ai ia le faiga, fausia, packing ia ma mea faapena lau Afioga i le Fofoga Fetalai. E tuu atu ai se tuualalo i lau Afioga i le Minisita, se i toe tagai lava i le tulaga lea. Masalo pe na o le tasi lava le kamupani lea e i i nei lea e lelei ona faia le tulaga lea le factory ma le compliance ma mea faapena, ona o lo o fau ese lava le fale e fai ai le sikareti. A o isi fale sikareti fou lea e i ai nei lau Afioga, o le a ou le taua le atunuu, o e mai fafo, ia e nonofo le aiga mai tua, ae fai le factory i luma, pe e nonofo foi le aiga i luga i le fale fogafalelua, ae fai le factory i lalo. Ae e tataua lava ona i ai lava se fale faapitoa, e ese mai i le mea o alala ai i latou o lo o faia nei pisinisi.

Lau Afioga i le mataupu lona lua, o le branding, o lea ua i ai nei ia le Tulafono lenei a le Ofisa o Tupe, e fai ai ia mea o brand o mea faatau mai i fafo, ina ia mafai ona maua ai le vaega e sili ona maua i luga o lea lelei. O le taimi lenei, ua ova atu ma le 20 brand o sikareti o lo o i ai nei i Samoa ae tasi lava le brand ou te iloa e au ia, e na o le brand lea a si vaega lea lea ua leva foi ona i nei lea e fai le Factory e tau o le Pall Mall lea e i ai le red ma le green. E tataua ona tilotilo lau Afioga i mea ia, ina ia mafai ai ona fai se brand, e mafai ai ona taga i nei i Samoa ia mo le lautele foi o le atunuu, e le o se mea lelei le ulaula, ia ae tataua ona fai le tulaga lea, e mafai ai ona maua e tagata ia le brand sao, a ua uma ona pasia atu e le tou Matagaluega ia aua o lea lava e talia, ae pasia, pasia atu e outou ina ia mafai ona faatauina. Ia o nai manatu ia e lua lau Afioga i le Minisita, ia e tuu atu i ina, e fesoasoani atu ai i le Tulafono, ia manuia le Fonofono ma le faaaloalo lava, faafetai.

FOFOGA FETALAI: Malo, tulai mai le sui usufono, ia tulai mai le sui usufono mo Salega Sasae ona sosoo lea ma le sui usufono mo Anoamaa Sasae.

Tofa OLO FITI AFOA VAAI (Salega Sasae): Faafetai lava i lau Afioga i le Fofoga Fetalai, piiama foi lenei itumalo i le taulaga ua siitia i lenei taeao, ae e puupuu lava se fesili i le Afioga i le Minisita e taua atu i le Nofoa. Ia ua

malamalama uma i le tulaga i le uumi o le lapopoa o le mamafa ae toe lava o le uumi lea e le i saunoa i ai lau Afioga po o le a le ituaiga uumi e uumi ai ia sikareti. E mafua ona ou taua le vaega lea, ona o lea ou te le i tilotilo atu i le Tulafono i le aafiaga foi o tapaa foi ia e fai e tatou i tua, mo mea o tipi ma mea faapena lea e gaosi mai i tapaa Samoa pe o lavea ai si vaega lena i lau Tulafono, o nai mea foi na o la e fesoasoani foi i nai aiga, ia ou te iloa foi e leai ni nicotine ae tatala mai le vaega lena ia e fesoasoani i nai o tatou aiga o lo o taumafaia lea atinae e fesoasoani ai foi i nai aiga. E pei e puupuu lava si au fesili lau Afioga i le Minisita.

FOFOGA FETALAI: Tulai mai le sui usufono o Anoamaa Sasae.

Afioga ALAIASA MUAGUTUTIA MOEFAAUO MALAGAITUTOGIAI SEPULONA MOANANU (Anoamaa Sasae): Faafetai mo le avanoa i lau Afioga i le Fofoga Fetalai, o lea foi ua momoli mai le soifua i lenei taeao fou i le paia o le Maota i le alofa ma le agalelei o le Atua. Ia ua talitonu foi, e le toe ta i Utuma se faamoemoe o le a fagatonu le malama e tusa ai ma le mataupu ua opea i le Laulau a Fono.

Ia o le Tulafono lava ua aumai, e lagolagoina i le aotelega a lenei itumalo, ae sa ou faapea o se Tulafono o le a taofi motu ai le tapaa, pe afai o le agaga lea e aumai o le tasi lenei mea o lo o faatupu gasegase i le paia o le atunuu, ae pei e foliga mai, o lea lava e aumai e taofiofia ia ma faatupulaia ai le tau o ia mea aua o tatou tagata. Aua a fai nei laisene ma nei mau mea, ia o le a faapena foi ona faapoopo isi tau a le aufaitapaa, ia e aafia ai lava ia o tatou tagata.

E i ai ia le mataupu lea e sau i i i mea ia o tamaiti, ae leai la se mea o faia e le Tulafono i le tamaitiiti lea ua 13 tausaga ua ulaula, 14 tausaga ua taumafa i le tapaa. O lona uiga e tatau ona oo i ai ia le malosi o le Tulafono lenei aua afai e faasala ia le tagata lea e 21 tausaga i lalo o le 21 tausaga ma faatau ia le tapaa, e tatau la ona faasala foi ia le tagata lea e laitiiti ia tausaga, ia a ua tagofia ia le tapaa ia po o lenei foi oloa.

Ia lea ua uma ona malamama le faamoemoe i le tele o nei mataupu i le Aso Gafua. O le fautuaga foi i lenei Komiti ua faatu e tatau ona aumai ni sui e le taumafa tapaa, ona aumai lea o ni latou finagalo foi lea e faapena ona ogatusa ma le faamoemoe o le Tulafono, aua a aafia ai ma le autaumafa tapaa i totonu o lenei Komiti, e fiu lava e toso lava e latou i le mea e fiafia ai latou, pe a faapea e fautuaina le Afioga i le Minisita. Ua leva ona tatou mafuta ma si Fale Gaosi Oloa o le Tapaa ua loa foi le tautua, ia pei ona taua e se tasi o sui usufono, e le o agai lava se vaai a se isi i le faaaogaina o tatou tapaa ia e toto i totonu o le atunuu, e fausia ai ia nei oloa, aua o le tasi lenei vaega o lo o fai se faatauvaga ma oloa nei tapaa, o oloa ia o le tapaa Samoa ma le tipi, se i tulou le tauga o le sikareti lea, ia tasi lenei oloa o le one of the biggest competitor i totonu o le maketi lenei, ae leaga o lea e le o oo i ai le Tulafono, ou te le iloa po o le a se silaisla a le Matagaluega pe aafia ai le soifua i le tulaga o le faaaogaina o lea foi tapaa Samoa lea, ma le agaga faaaloalo. O le matou manatu vaivai lea e tusa ma le Tulafono Tau Faaofi.

Ae avea foi lenei avanoa ua taia ai i le faalogo le paia o le atunuu, o lea faatoa maua so matou avanoa i tulaga foi na tulai mai i lo matou itumalo e aafia ai nuu o Falefa ma Lufilufi. E tulai atu ma lou loto maualalo, afai ua pisi le foe o lenei itumalo ma aafia ai le paia o le atunuu, e avatu vaimalu i puega ma asuasua atu vaimalu. Mo le silafia e lo tatou Maota, ia ua taoto i lagotonu le faamoemoe.

O le mea lea ia viia le Atua. O le agaga maualuga sa faaalua i le feiloaiga a le itumalo, o e e faatupu le filemu, ia ua taua i latou o fanau a le Atua. O lona uiga, ia o fanau uma lava a le Atua o la e i tua i le Anoamaa i le taimi nei, ona ua latou faatupuina le filemu. Ae faamalulu atu i le faafofoga a lau Afioga i le Taitai o le Malo ma le paia o le Maota, ia o se matou tala lea matou te faamaualalo atu ai i le Maota ona o tulaga na aliali mai, ae talosia i le alofa o le Atua e le toe tulai mai se mea faapea. O le moemoenoa ma le laufaleaina, e tatou te fiu lava, leaga o lo o malosi foi le alii o le lalolagi i lenei vaitau. Ia manuia le Tulafono pei ona tulai mai le Afioga i le Minisita, faafetai mo lou avanoa i lau Afioga i le Fofoga Fetalai.

FOFOGA FETALAI: Malo faafetai, ua faafofoga foi le Palemene. Se i tulai mai le Afioga i le Palemia. Malie le sui usufono mo Faleata Sisifo, se i tapa le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi (Palemia): Lau Afioga i le Fofoga Fetalai o lea ua faafofoga le atunuu i le kofesio o sui usufono lea e ana itumalo ia e faatupu faalavelave, fai ma lua o i lua itumalo. Ae e agai tonu lava lau mataupu i le ata foi lele o le Ten Commandments, se i fai ma tova ai le tatou Fono. E manatua foi le ata lea o le Ten Commandments lea e sefulu tulafono a Mose lea sa faafoe mai e tagata lauiloa nei o Charlton Heston ma Yul Brynner o Yul Brynner la sa faa-Farao. O Yul Brynner o lesi lea tagata lauiloa i le mea o le fai tifaga, e oti le tagata lauiloa lenei ua multi billionaire i le tele o seleni na ia maua. E i ai le taeao ua fai si leva sa ki ai lau TV a o i ai i Iapani i le isi foi fonotaga, e i ai la le polokalame a le Malo o Amerika e faapea, Good morning America, e aumai ai la mea o tagata lauiloa e aumai ai ni nai a latou fesoasoani faafautua, o le a ou le toe taua lea upu o le tuualalo ae aumai ai a latou tuualuga e fautua mai ai i le lalolagi. E ki atu loa lau laau, ae tu mai ia Yul Brynner, ae tu mai loa e laei mai i ona laei sa na ia pueina ai foi le ata foi lele, The King and I e autu ia Thailand ma latou nofoaiga tupu o aso anamua. O lea la ua tu mai, sii loa ma lona lima taumatau ma faasinotonu mai lava ia te au, o au lea e tu, ua ou te'i e vaai atu e faasinotonu mai lava ia te au ma faapea mai, o le latou polokalame, 'oe lea ou te tautala atu ai' ia ma faasino mai lona lima sau tonu lava ia te au, 'oe lea e te matamata mai ia te au i lenei taeao, lea ou te tautala atu ia te oe i lou faavalevatea, pe afai e te ula tapaa, ua outou vaai mai o au o le tagata poto, e tele au tupe, ae pau lava lea o le mea valea na ou faia, o lou ulaula, ua ou tago i lenei mea o le tapaa, lea la ua ou mai i le kanesa, ua toe nei o se aga, ona ou oti ona maumau lea o lea e le i taitai lou ola.' Ia pau lava lona o lana feau. Ia uma loa le Good morning America ae faasolosolo polokalame, ia e fai mai la i le po ia na ou alu loa ou moe, e ki atu lau TV i le taeao, ae sau le faasalalauga, ua maliu le tagata lauiloa i le lalolagi o Yul Brynner, ua oti maumau lona soifua ona o le tapaa. Ia a o si ata lona e pau lava lona o le mea na ou fia tau atua ia te outou. O upu a Yul Brynner o au o le tagata poto, ae ua aliali i i lou faavalevatea, ona ua ou tago fua i lenei mea o le tapaa ua ou oti ai. Ou te foi mai, e ki atu lau TV i inei, ae sau le ata o si tatou tama foi lea sa faasalalau news mai le 2AP o Pat Mamaia, ua ou te'i lava i lou vaai atu ua leaga faia le tino. Ae sau foi ma lana ia faatoesega e faapea mai, ua le o toe umi ona ou oti lea, ua ou lavea i le kanesa. Uma loa lona, ae sau loa ma le faasalalauga ua ou le toe vaai i ai ua ou fiu e fai i le falemai, se i

toe sau lava le latou faasalalauga lena lea e sau loa, ae sau loa ma le faaupuga, e leaga le ulaula, sau loa ma le mea lea, tulou lava o mea o upu foi ia tuusao ina ia malamalama ai i latou o lo o faafogafoga mai i le taeao lenei, na ona pue mai lava ia faamaga loa se i tulou le tagata lea alu atu le asu, alu atu lava le asu ma alu atu lava ma ta uma atu ai ma le alaea alu atu lava i totonu alu lava i totonu le ata, ua uliuli patoi uma atu ai lava, ia ona sau loa lea o lena mea lea le nicotine lea sa lauga mai ai ia le Afioga i le sui usufono o Anomaa Sasae lea e mafua ai le mea lea o le kanesa. Ua ou fiu e toe saili, se faasau le mea lena, ia ae fai mai ua le iloa. O le manaia ia o lena faasalalauga.

Lau Afioga i le Fofoga Fetalai, o le matautia lena o le Tulafono lea e faafetai foi i le Afioga i le Minisita ma le aumaiga o le Tulafono lenei. E i ai lava le itu faigata o le Tulafono Tau Faaofi lenei, ona pei e tagofia ai le aiatatau a le tagata, lana aiatatau foi lele e pule lava ia i lana mea e fai. O le ala foi la lea, aua e lua lava ituaiuga iuga e faia e le Malo, o le matua taomi o le aiatatau, taofi loa, aua ne i toe faaulufale mai se tapaa. Ma le lua, o le matua faafaigata o aiaiga o le Tulafono ina ia faigata ai ona toe ula tapaa ia tagata. O le isi la mea o aiaiga ia, a o le isi mea e masani ona fai e le Malo, o le matua tuu lava i luga i le lagi ia le tau o le sikareti ina ia oo lava po o le \$100 i lau tapaa e tasi, se tamai tapaa foi lea e na ona ula lava uma po o le tuu i le \$100. Ae tasi lava la le auala e faamalosia e le Malo, o le matua tuu lava i luga tiute. O mea ia e faatamaia ai le soifua, tuu i luga tiute o mea ia e faatupu ai mai, mea suamalie, mealololo. Aua e faigata tele ona taofiofi le tulaga saoloto o le mea lea o le pule lava le tagata ia. A o le mea lea e tupu nei, o le matua taugata, o vaiaso uma, vaiaso uma, vaiaso uma, o alu atu talosaga a fomai, ave i fafo latou ia ua mamai. O le mea la lena, e le mafai lava ona aveese le Malo mai le faiga o Tulafono, o Tulafono e matua tuu ai lava i luga tiute, o mealololo, moa, o mulipipi, tuu i luga, ae faataga pea. E ala ona ou fai atu mea ia, ona o tatou e tatou te manumanu i le soifua maloloina, ae sau loa se Tulafono foi lele ua tuu i luga, talofa i le atunuu, o upu ia e alu atu i totonu o le Maota lenei. Afai tatou te manumanu i le soifua o tatou tagata, e tataua ona fai e tatou Tulafono e tau taofiofi ai le tagofia o mea ia, aemaise o mealololo. A o le Malo ia, toetoe lava ina matua fai loa faaiuga, tapu mea ia. E leai lava se mea e eseese ai le sikareti ma le mea lea o le uisiki, mea o...so o se...e oo i le vodka, taofi ma le pia, tofo la ae fai e le Kapeneta lena mea, oi, o le alalaga a le atunuu, o se Malo ina a le mafaufau, a o mea na o lea e taumafai ina ia saoloto pea le tagata ia, saoloto pea i lona soifua, o le tagata e fiaola umi ma le tagata e fia oti vave, ona alu lava lea o ia e fai mea ia. Ae pau la le mea o le a agai loa i ai le Malo, o le matua fai o aiaiga ina ia taumafai, o le tagata lava ia e fiapoto pei o Yul Brynner, poto loa, ae le aoga le poto atu ua le aoga, ua toetiiti lava tuu i le lua. O le tulaga la lena o lea e faavae ai Tulafono ia a le Malo, ia tuu pea le avanoa i tagata, o lea na tulai mai le isi sui usufono talanoa i mea o galuega, o le tele ia o fuafuaga a le Malo ua aafia ona o le mafaufau i mea ia o galuega, galuega ia sa laga mai e le isi sui a usufono. O le taua o manatu na, o lea e fai ma lilifa ai pea ia fuafuaga a le Malo, faia ia ni gaoioiga e faafaigata ai ona faatau e tagata, ma vave faapopoto ai, i le taumafaiga lea o lo o taumafai atu ai le Malo. O le mea lea o le tapaa lea e tupu ai le kanesa o le mama, o le tasi lena o kanesa o faamai oti ia o lea e aafia uma i totonu o le Non-Communicable Diseases lea sa lauga pea ai le Afioga i le Minisita, o faamai nei lea e feoti ai le 3¼ o tagata o le Pasefika atoa, 3¼, o le ala lena e taua ai o faamai nei o faamai oti, o lea la e aafia ai le kanesa.

Lau Afioga i le Fofoga Fetalai, o lea e taua le tipi, e aafia foi le tipi ma mea o fili tapaa. O lea sa maoae ai le afioaga lea o Leauvaa, e fiafia e fai le mea ae ou te le iloa po o ua fia ni tagata ua feoti ai, talu ai tapaa a Leauvaa. Ae sa uunaia lava mea ia ona e ola ai latou, ae tafefe i se toatele o tagata o la na feoti ai i nei mea.

Lau Afioga i le Fofoga Fetalai, pei o le agaga lena. O lea e taumafai lava le Malo ia faasaoina o tatou tagata i le faafaigata o aiaiga ae tuu pea le tagata ia e pule ia, a fia oti, faitalia ma lana faaiuga, a fiaola umi, faitalia ia ma lana faaiuga. Silasila foi lau Afioga i le Fofoga Fetalai, a o le i faia e le Atua le tagata, o le mea lena e ma te talanoa soo ai ma lau Minisita Lagolago e fealuai ma le Tusi Paia i le 30 itula o le aso, a o le i faia le tagata ona finagalo lea o le Atua, tuu i ai ma le saolotoga, saolotoga e fai ana faaiuga, lea e sai ai isi tagata o le a foi le mea na toe tuu ai lena mea o le saolotoga, a na le tuu fua i ai lena mea o le saolotoga e le agasala ia Atamu ma Eva. Ae a na aveese lena mea, semeamanu faapenei o lea tatou te i ai lava i lalo nei, ae tatou te o uma lava i le lagi, e leai ma ni faitioga ma lalafi i tua o le OLP e pei o le mea lea e fai e le tama lea o Levaopolo, i le lalafi i tua o na mea ma faaleaga mai le Malo...

Tofa Olo Fiti Afoa Vaai: Lau Afioga i le Fofoga Fetalai...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Ua uma ai foi i i.

Tofa Olo Fiti Afoa Vaai: Lau Afioga i le Fofoga Fetalai...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: O outou uma lava ia, e lavea ai foi ma Levaopolo, tuu, tuu le amio lena, aua na ou fai atu, na faasalalau atu, e leai lava se isi o outou e le o iloa, lea ua iloa uma lava, outou ia e faavevesi le atunuu, ae lea la ua uma ona fautuaina ia le... lea ua ou tau atua na o oe, lea la ua fautuaina le Ofisa o le Loia Sili ma le Komesina mo Leoleo, molia, molia i le Tulafono. O le a vevesi le atunuu lena ona o mea nei tou te faia.

Lau Afioga i le Fofoga Fetalai, o le a faaiu atu i i ia si au agiagi i mea tau tifaga. Fai ma tatou o tatou tifaga, pue mai aoaga lelei.

Tofa Olo Fiti Afoa Vaai: Lau Afioga i le Fofoga Fetalai, pe maua lava sina avanoa i le tulaga lea ua saunoa ai le...

FOFOGA FETALAI: E le o taua lou suafa...

Tofa Olo Fiti Afoa Vaai: A lea na taua e faatolu lava ona tau mai...

FOFOGA FETALAI: O Levaopolo a o oe o Olo.

Tofa Olo Fiti Afoa Vaai: Ia leaga foi na avatu lava lau Levao ma le P ae tuu lau... lea la ua ou sau ma lau Olo ae...

FOFOGA FETALAI: O Levaopolo lea sa sui usufono talu ai a o Olo lea ua sui usufono nei. Ia saunoa le sui usufono.

Tofa Olo Fiti Afoa Vaai: Faamalulu atu o lea ua saunoa le Afioga i le Palemia i le tulaga i le OLP, ma ua tele foi taimi ua ou faalogologo ai i tuuaiga nei ia te au. Ae faafetai o lea ua ou faalogologo atu, tuu atu ia i le Faamasinoga se i matou o atu se i faasao le mataupu lea, ma e le logo lelei foi ia te au ma lo matou itumalo ia le tuuaiga lea. Ia a o lea ua saunoa manino lava le Afioga i le Palemia i totonu o le Maota, ia o le a ou faatali atu i le tatou mataupu. Leaga e le mama, e matuia le tuuaiga ma le agaga faaloalo, faafetai.

FOFOGA FETALAI: Ia malo, faafetai, malo. Masalo toe pau lea o le sui usufono e fia saunoa i le mataupu leni le sui usufono mo Faleata Sisifo ia o lea foi ua tele ina malamalama le mataupu i le saunoaga a le Minisita o le Soifua Maloloina.

Tofa Lealailepule Rimoni Aiafi: Faafetai lava, e fesoasoani atu foi i le fofamai, Dr. Tuilaepa. O le mea lea e tupu ia Levaopolo, oi ia Olo, i le lakapi lea na tupu i le vaiaso lea na tea nei, na tuli le matai o le matou nuu e alu e faalogologo i tai i le fonu a le Iuni la e fai po o le a le mea e fai i tamaiti la e faatupu misa. Ia, alu atu loa fai le fonu a le Iuni, o le tagata e toe faatupu misa, o le a suspend. Ua foi mai loa le toaina, fai le matou fonu ou fai atu, ia se i fai sau tala po o le a le mea ua tupu? I le faasalaga e fai i tamaiti e faatupu misa, nofo nofo le toaina ua galo ia te ia le upu faapalagi lea na tau i le fonu. Ou fai atu, se fai sau tala o le a tuai, fai mai le toaina o lea ua fai le iuga, o le tagata e toe faatupu misa, e sasa tele e le nuu, o le mea lene e tataua ona fai.

Lau Afioga, o le fesili i le Afioga i le Minisita, e fia ea ni a tatou fale sikareti lea e i ai? O lea na o le maua i ou taliga e i ai fale sikareti fou ia e i ai nei, aua e tasi lava le fale sikareti lea ta te iloa e ta ita. A lea faapea e i ai le fale sikareti lea e i i Tafaigata. Afai e moni, e matua leai se foliga o se fale sikareti i le fale gaosi mea i lea ituaiga fale.

O lona uiga, ae le i avea se laisene, e tataua ona tagai lelei i ai po o faamalieina ia vaega uma o le Tulafono. Aua e le talafeagai pe afai o ituaiga foliga ia pe afai o fai ai foi sikareti, e le talafeagai i lou talitonuga. O le masina lea na tea nei, na o matou lava ma le Minisita ma le Minisita mo Tina ma Tamaitai sa matou i ai i tai i le faalauiloa sa fai i tai i le Tanoa a le Matagaluega, na declare ai Samoa o le atunuu e le toe... smoke free i le isi fia ea tausaga. O lona uiga o le a le toe i ai lava se ulaula i totonu o Samoa, se tapaa. Ia ou te le o malamalama la pe e mafai ona fai lea mea, a lea e tuu mai i le Tulafono, o lea e foliga mai, o lea ua aiaia ia laisene.

Ou te fia fesili foi la, e 3 ituaiga laisene ia e aumai, laisene e gaosia ai le tapaa, laisene e aumai ai i totonu le tapaa ma le laisene e faatau atu ai, distribute. O lau fesili lau Afioga, o le a le mafuaaga ua fai ai le laisene lea... o lona uiga o le a lavea ai ma faleoloa, wholesale, ma mea faapena ma faaopoopo ai ia pea afai o lona, ae le fai la... afai ua fai le laisene e aumai i totonu, ia fale tapaa, fale gaosi tapaa, e tataua ona tilotilo pe fia ni laisene e mafai ona ave? A o le a foi le tupe aua sa tataua ona aumai, pe fia? Aua o lea e faalogologo atu i nisi o sui usufono o lea e afa miliona i le tausaga. Ia o se tupe tele ae talafeagai, e talafeagai la e pei o fale sikareti e i ai nei, e matua tele ia le capital investment, tele le tupe e alu e set up lelei, ina ia manino, faamalie uma tulaga faale-tulafono mo le soifua maloloina ma vaega uma.

Tasi le vaega lea lau Afioga i le Minisita lea e faapea mai, e tuuina atu e le Pule Sili ia le laisene, ae afai e le faamalieina le tagata, afai e le avatua le

laisene, e refuse le laisene, e mafai e le tagata lea ona tusi i le Minisita, ona toe i ai lea o le avanoa e tatala ai le laisene. Ia tailo i ai, a o lou talitonuga, e pei e le logo lelei lea mea, aua o le CEO lava o le Minisita foi lea, ae le tuu, afai e i ai se mea e le fiafia ai, ave la e i ai le Tulafono, ave i ai e faamanino, ae pei e le talafeagai i lou talitonuga, le tetee atu e le CEO, ae toe talia... e i ai le avanoa e talia ai e le Minisita. Ia tailo, ia aua i lou lea talitonuga, o le tala lea e tuu mai, e tele le sootaga o le alu i lalo o le ulaula tapaa, ma le siitia o le tau o le sikaleti, aua o lea e faapea mai, o Samoa o le isi atunuu ua pito sili ona taugofie ai le sikareti pe a faatusatusa i Niu Sila, Ausetalia ma atunuu ia.

Afai la o lea ua i ai le faamaoniaga ia outou i faamaumauga e pau e alu i lalo le numera o le ulaula ona o le siitia o le tau o le tapaa, ia e tatau la ona tatou mulimulitai i ai pe afai o lea e matua taugofie tele i totonu o le tatou atunuu ia le tau o tapaa nei. O lea foi e faapea mai, e i ai tagata ia ua import mai ia le tapaa e toto i totonu o Samoa, ia se i saili lea vaega pe moi, aua e le talafeagai o lea lava e i ai tatou tapaa na masani ai, e faaoga ma fai pe le mafai ona fai se fale tapaa ae faaoga ai na o tatou tapaa ia, pe afai o le mea lea e agai i ai, aua e le mafai ona tatou tuua ia mea.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai...

FOFOGA FETALAI: Ia, se i tulai mai ia le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: I le mataupu lea tau ina ou maua atu i le role a le Minisita. Ua ou manatua ai lava ia le tausaga na ou Minisita ai ae telefoni atu le Palemia ia te au, se i e tilotilo ane lava i le Afioga ia Tofilau, se i tilotilo ane lava i si tamaloa lea na sau ia te au e uiga i lana laisene, o lana faleoti. Ua teena le laisene e le Inland Revenue ona o ni tulaga, fai mai le falemai, ua lava le faleoti lea e tasi. Ia e le i umi lava ae tu le tagata e ana ia le talosaga le faleoti lea e i Malifa ma lana talosaga, ia ona sau loa lea fai mai ia te au, ua teena lana talosaga ona ua fai mai ia le pule o laisene o le Inland Revenue e i ai lana faleoti, ua teena ona ua fai mai le falemai, ua lava lea laisene, ua lava lea faleoti, e le toatele ni tagata e feoti i Samoa ma ua ova foi ia le tasi lea.

Ia ona ou telefoni loa lea i le Pule o le Falemai, ae o la e saofai le tagata lea i ou luma. Ou telefoni atu ae fai mai le Pule o le Falemai, e leai lava ma se mea faapena o i ai, ae o le tele foi o faleoti e maua ai le tauvaga ia ma taugofie ai mo tatou uma. Ia ona fai loa lea o lau tusi, e ave loa i le Pule o le Inland Revenue e fai lana faleoti, se i toe silasila ane i lana faaiuga, pe talafeagai, o lea ua uma ona ou siakia, e leai se manatu faapena o i ai i le falemai lea ua mafua ai ona e teena. O le mea lea, toe silasila totoa i lau faaiuga, e ono tuuaia oe i le conflict of interest. Ia o le mea la lena na ala ai ona maua ia lena foi faleoti, mulimuli ane maua le faleoti e pito sili ona lelei, le faleoti o Sefo Pau. Ia o le tulaga la lena, e taua tele le tulaga o le i ai o le Minisita, e sulufai mai i ai tagata, pe afai e le faavaea lelei ia le faaiuga a le CEO.

Ia lau Afioga leaga o lea na oo i ai le saunoaga a le sui usufono o le mafuaaga lena, ne i tei ua faapea o faaiuga a Minisita e polokiki, e leai o i, o le Court of Appeal foi lele e apili mai i ai tagata pe a faaletonu faaiuga e fai i lalo. E tatau

ona i ai se isi e i luga atu, e sulufai i ai tagata pe afai e o mai i lalo, e faaletonu atu le tali i lalo. E tele foi i taimi e omai ai i luga latou ma toe faamaonia atu e Minisita ia le iuga ua fai, ae la e sao ma amiotonu ia le faaiuga lea e fai e le Faauluuluga o le Matagaluega.

FOFOGA FETALAI: Malo, manaia le faamalamalama a le Afioga a le Palemia, ua manino ai auofala i lea vala, e pei ona laga mai e le sui usufono mamalu, masalo foi ua maea le saunoaga a le sui usufono mamalu. Ia faafetai, malo, faafetai i le sui usufono mamalu, ia o mataupu e lagalaga e faamanino e malamalama ai, ia aemaise foi le faafofoga mai o Samoa, faafetai. Ia pe i ai se isi mea e fia oo i ai le saunoaga faamalamalama a lau Afioga i le Minisita?

Afioga Hon TUITAMA TALALELEI TUITAMA: Lau Afioga i le Minisita, talitonu lea ua maea ona saunoa ia le Taitai o le Malo, o lea ua aafia uma ai lava ia vaega sa laga ma malamalama ai le mamalu o le Maota. Ia aua o isi ia vaega ia ua toe auala mai ai ia fesili, ia o le vaega lea na taofia au ae le i oo atu i ai ia lau faamalamalama i luga o le tautinoga ua malamalama uma ai. O lea la o le a ou le tali atu ai i le tulaga lea, aua o lea ua uma ona soaluapule i le tatou session foi sa fai, ia o le mea lea e faafetai lau Afioga i le Fofoga ma le mamalu o le Maota ia mo le avanoa mo lenei Tulafono.

FOFOGA FETALAI: Faafetai.

Na faamaonia le lafo ma faitauina le Tulafono Tau Faaofi o Teuteuga o le Tulafono o Puipuiga Mai Aafiaga o le Tapaa 2018 i lona faitauga faalua.

FOFOGA FETALAI: E tusa ai ma Tulafono Tumau o le a tuuina atu le Tulafono i le Komiti o le Va Fealoai mo le iloiloia ma toe lipoti mai i le Fonotaga e sosoo ai.

TULAFONO TAU FAAOFI O TEUTEUGA O LE FAAVAE (NU.2) 2018 – faitauga faalua

FOFOGA FETALAI: Ou te tapa ma le faaaloalo le Afioga i le Taitai o le Malo.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai faapea foi le mamalu o le Maota, ou te tulai atu ma le faaaloalo e faatu le lafo, *Ina ia faitauina nei le Tulafono Tau Faaofi o Teuteuga o le Faavae (Nu.2) 2018 i lona faitauga faalua, ma ou te fia tautala faamalamalama i ai.*

Faaluaia e le Sui Palemia, Minisita mo Pisinisi ma Alamanuia, ma le Minisita mo le Soifua Maloloina.

FOFOGA FETALAI: Ma le faaaloalo ou te tapa lau Afioga i le Palemia mo lau saunoaga faamalamalama.

Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI:

Lau Afioga i le Fofoga Fetalai, o le Tulafono lenei Tau Faaofi o Teuteuga o le Faavae (Nu.2) 2018, e pei lava o le Tulafono o Tapaa, ou te tulai atu fua e faamalamalama, a ua uma ona malamalama i ai le Maota ona o lea sa tagofia i le aso sa faamalamalama ai lea mea. O le faiga fou lea ua i ai nei, na amata mai i le nofoaiga talu ai, ou te faamalo foi i lau Afioga i le Fofoga Fetalai ia faapea ia le Faauluuluga o le tatou Maota nei, ua tele le taua o se faiga fou ua faia nei i le taimi sa ou faatoa tulai mai ai, e table, e faataoto le Tulafono i le taeao o le taimi foi lena faatoa matou faitau ai. Na ona faataoto lava amata loa ona lauga, e leai se avanoa e tasi lava e faitau ai pe faamalamalama.

Ia ona tulai lea o Tofilau lauga faalauaitetele i le Tulafono, e uma ane ona lauga Tofilau, ua uma ona faitau e lea le Tulafono faatopetope ia tu i luga, ae o lea e alu le faasologa a matou i le faitauga o le Tulafono. Uma atu le toalua, ae ua uma ona faitau faatopetope e le vaega atoa ia le Tulafono ona faatoa tu tulai loa lea i luga. Ma ou te talitonu o le faiga fou lea ua taou faia, ua atili malamalama ai a outou Afioga i le Tulafono ona atoa le aso i luma mai o fai a tatou faatalanoaga nei ia ma i ai ia le Ofisa Loia ma omai foi ia faatumutumuga o Matagaluega o lo o taulamua i le Tulafono ma faamatala auiliili. O le ala foi la lea na taofi ai e le Maota le Minisita o le Soifua Maloloina, ona o lea ua maea uma lava ona faamalamalama le Tulafono Tau Faaofi. Ae o le taua o le toe tulai atu pea o matou nei i le taeao lenei lau Afioga i le Fofoga Fetalai, ona o lea faatoa faafogafoga mai le atunuu, o le itu la lena e taua ai le faafogafoga mai a Samoa aemaise foi o le tapuaiga a Le Ao Mamalu O Le Malo, le Sui o le Fono a Sui Tofia ma le mamalu o le atunuu o lo o tapuai i ona tulaga faalupelupe.

O le Tulafono Tau Faaofi lenei e Teuteu ai le Faavae o le Malo Tutoatasi o Samoa, ua aiaia se tulaga o le toe faaleleia atili o le Tulafono i le tulaga o galuega faale-Faamasinoga o Fanua ma Suafa. Ia faapena foi le saunia ai o le Matagaluega o Faamasinoga ma le Pulega Tau Faamasinoga i le itu o le faatinoina o latou galuega fai. O le faamoemoe o le Tulafono Tau Faaofi, o le faaopoopoina lea o ni sui faaopoopo se toatolu i le Komisi o Galuega Tau Faamasinoga, o le Komisi lea e faia nisi o faaiuga tetele e taipei o le tofia o Alii Faamasino, e ala i le teuteuina la lea o le Mataupu 72 o le Faavae e faapena ona avanoa ai isi faatonuga i le Tulafono o faagasologa o galuega a le Komisi o Galuega tau Faamasinoga e faatinoina ia tulaga ia.

Lau Afioga i le Fofoga Fetalai e pei ona silafia, e mavaevae lava Itutino nei e tolu o le Malo, o le Palemene nei e faauluulu i lau Afioga, ia faapea foi ma le Faamasinoga e faauluulu i le Faamasino Sili, ia e faapena foi i matou o le Kapeneta ma le afaigaluega uma a lo tatou Malo o lo o gafa ma tonufai ma le faatinoina o atinae a le atunuu. E patino lava Itu nei e tolu o le Malo, ia ma e agai e le isi Itutino le isi Itutino. O le ala lena o lea e faalupe ai pea le Tafatolu lenei o le Malo, o le Tafatolu Fefaatauagai, e agai e le Faamasinoga ia Itutino ia e lua, e agai e le Palemene Itutino e lua o le Faamasinoga ma le Pule Faatonu o lo o ia te au ma Minisita o le Kapeneta ma le afaigaluega uma a le tatou Malo, ia e agai foi e matou ia le Palemene faapea foi ma le Faamasinoga. Ae i ai la ni mea faaletonu, ia e faapena ona faatonu foi ma faufautua ia isi Itutino. O lea la e mafua ai ona faatu le lafo ma pasia e le Palemene lenei, o le a fai se

Komiti latou te tilotilo i le faagaioiina o galuega a le Faamasinoga ona ua tauau ina anoano ma tele ia faitioga faasaga i le faatinoga o Faamasinoga. O lena e silafia ua uma ona taoto le Lipoti ma o le isi la vaega taua ia na taunuu i ai le Lipoti a le tatou Komiti, ina ia faatino e faalelei atili ia galuega a le tatou Komisi la lea o Galuega e faataoto ai galuega tau Faamasinoga a le Faamasinoga. O lona uiga, o lea e tali le Kapeneta i luga o fautuaga na aumai e le Komiti ma pasia e le Maota lenei. A o le Kapeneta foi la lenei, e le o se Kapeneta foi lele e na o le nonofo i luga o nofoa ma faaluelue ai. O le Kapeneta e na te silafia loa se mea taua ua avatu i totonu o le Palemene lenei, ona action loa lea. O lea la ua uma ona tauaao e a outou Afioga ia le Lipoti a lena foi Komiti taua a le Palemene lenei, o le faatinoga la lea o le latou fautuaga, o le Lipoti ma le Fautuaga ua uma ona pasia e le tatou Maota, ae talu ai ona e aafia ai le Faavae, ia o le ala lea o lea ua teuteu ai le tatou Faavae. Afai foi e manatua e le Maota, o le isi lea fautuaga ma tuualalo a le Maota lenei i le isi foi mafutaga sa fai faa-Semina na tupu ae ai se finagalo o tatou sui usufono, e fautua mai le Malo ina ia teuteu le Faavae ina ia amanaia le aiatatau a alii ma faipule, communal right, po o aia toatele ia e aofia ai faalapotopotoga, ona o le mea lea e i ai nei Tulafono a Samoa, o lo o mulimulitui i Tulafono faapapalagi mai Peretania, e agai tasi lava na o le aloaia o aia a tagata taitoatasi, ae le amanaia le aia a tagata e pule toatele, e pei o ekalesia, pei o faalapotopotoga pei o alii ma faipule o tatou nuu. O lea foi la na lotea ai i ina i le tatou mafutaga le tulaga lea, o le le o i ai i totonu o le Faavae o le Malo o Samoa, le Faavae lea e i le Atua Samoa. O lea foi la na fai ai le tatou tonu ma o lea foi la ua uma ona teuteu le Faavae e tusa ai o tatou faatalanoaga sa fai.

Lau Afioga i le Fofoga Fetalai, o le uiga lena o le upu, e le o se Kapeneta nofonono le Kapeneta lenei. A silafia loa e le Kapeneta se mea taua ua agai i ai le Maota lenei, fai loa, aua le toe tuu i se isi taimi. O le taimi lava ua aumai ia i tatou e le Atua, fai loa, e leai se isi taimi.

Lau Afioga i le Fofoga Fetalai, ia o le atoaga lena o le Teuteuga lena o le Teuteuga ua uma ona lagolagoina e le tatou Maota e tusa o le Lipoti a le tatou Komiti o le Palemene.

FOFOGA FETALAI: Malo faafetai. Ia se i tulai mai le sui usufono mo Aleipata Itupa i Lalo.

Afioga TAFUA MALUELUE TAFUA (Aleipata Itupa i Lalo): Lau Afioga i le Fofoga Fetalai, e momoli atu le agaga faafetai i lau Afioga i le faafoega o le tatou Fonotaga i lenei taeao, e ave foi le agaga faafetai i le Afioga i le Palemia e tusa ma le lafo ua faatuina i le suiga o le tatou Faavae. E pei lava foi ona silafia, o nei mea o Faavae, e sui sui mai lava i lea taimi i lea taimi, ae ia ogatasi ma taualumaga ma gasologa o le soifuaga.

O lou tulai atu la ma le agaga faaaloalo, e lagolagoina lenei Tulafono po o lenei suiga. Lua, e momoli atu lou agaga faafetai ma le agaga faapitoa i lau Afioga i le Palemia ma le Kapeneta, ona o lea ou te manatua le 2016 ia Aperila ina ua uma le palota i le 2016 sa fai ai le tatou workshop lea sa ou laga ai foi le vaega lea, o le foliga mai e lilifa tele le Faamasinoga i le vaega foi lea o le tatou Faavae o le aiatatau a le tagata toatasi, verses i le community responsibility ia po o le aiatatau a le nuu foi lele po o le vaega toatele. E faavae lea faamatalaga ona e i ai nai faamasinoga sa ou faalogologo i ai ma ou lau i a latou iuga, o se faaitaiga, a faapea e ave i le tagata e toatasi le nuu atoa i le tetee o le nuu aua ne i faia se ekalesia i totonu o lea alaafaga po o lea

alaalafaga, e lilifa tele le faamasinoga agai i le individual right po o le aiatatau a le tagata e toatasi, ae faagalo le nuu atoa lea o i ai le latou iugafono po o le latou tulafono e tasi lava pe fia ekalesia i lo latou nuu, po o se faataitaiga lea lau Afioga, ma le faaaloalo, a o lenei la ua alu ai alu ai, ua pei ua talia foi nai talosaga sa tuu atu ma ua fiafia lava e faailoa atu, ese le manaia foi o lenei suiga o le a tatou i ai o le suiga o le Faavae, aua e le gata o lea foi pei o le a tatou sailiili ai i le Faamasinoga maua le isi vaega e toatolu e faaopoopo i le Faamasinoga. O lea ua 55 tausaga talu ona faatu lo tatou Malo Tutoatasi, ia a o lea na o le toatolu lava sa i ai i le Komisi o le Faamasinoga, o le Afioga i le Faamasino Sili, o le Loia Sili, ma le Sui o le Minisita o Faamasinoga, o le mea lava lenei sa sau ai talu mai le 1962. A o le suiga fou la lea e i ai pei ona silafia uma e le Maota nei aua le faafofoga a le atunuu, o le faaopoopoga lea o le a i ai ma le Resitala o le Faamasinoga o Fanua ma Suafa e le palota pe a fai ia le palota, o le a i ai ma le sui o le...o se Faamasino mai le Faamasinoga Sili ua malolo, ia ma le Peresetene o le Faamasinoga o Fanua ma Suafa. Ou te lagolagoina la le suiga o le tatou Faavae aua o lea o le a sui ai le tulaga lea.

E matua momoli atu lava lou agaga faafetai i lau Afioga i le ona le Tulafono e faapea foi le Loia Sili. E pau lava le agaga ua ou tulai atu ai, o le vaega lea i lalo o le (e) lenei e i ai e faapea, o le Faamasino ua malolo manumalo mai le Faamasinoga Sili. Na o se tuualalo ae le fai ai, sa ou laga foi le vaega lea i le taimi o le tatou workshop, afai e le i ai se Faamasino mai le Faamasinoga Sili ua litaea ma faamalolo mai le taimi e uma ai le vaega lea o le a fai ai le Tulafono lenei, pe faamata pe a pe faaopoopo i ai nisi vaega po o a uma loa le vaega na o le Faamasino mai le Faamasinoga Sili po o so o se Faamasino ua i ai le agavaa ma le tomai faa-Loia. Lua, po o se sui sinia mai le vaega foi lea o Faalapotopotoga a le Sosaiete o Loia, pei o nai mea na e faaopoopo i ai.

Ae momoli atu le agaga faafetai i le Taitaifono ma le Komiti sa latou iloiloina lenei mataupu, matua manino ma malamalama, manaia le latou fuafuaga. Ae pei na o le pau lenei o le mea na ou tulai atu ai ma le faaaloalo, manaia pe a tuu i ai le vaega lenei, aua e pei o le agaga lenei o le mafuaaga na taumafai i ai se suiga laitiiti po o le faaopoopo. O le tuualalo lea ma le faaaloalo.

FOFOGA FETALAI: Se i tulai atu lava le sui usufono mo Gagaiifomauga Nu.3.

Afioga Hon LAAULI LEUATEA POLATAIVAO FOSSIE SCHMIDT (Gagaiifomauga Nu.3): Faafetai i lau Afioga i le Fofoga Fetalai, e manatu foi e le moemoenoa, ae moe alaala ma moe manatunatu se lagona o lenei itumalo ona o lea ua tatou laasia foi lenei Tulafono Tau Faaofi taua i lenei aso, o le Faavae o lo tatou Malo, aemaise ai o lenei ua taunuu le filifiliga a lo tatou Maota e Teuteu le Faavae, ia ona o le Ofisa o Fanua ma Suafa ma le Faamasinoga a Samoa.

E muamua ona momoli le faafetai i le Afioga i le Faamasino Sili, aemaise le Ofisa o Faamasinoga le Afioga i le Ofisa Sili o Pule, Afioga i le Resitala ma le Afioga i le Peresetene ma le mamalu o le Faamasinoga, ona o le galuega fita i fatia ua sola ma aso ua alu ma e na asa le gasu o le taeao i lenei Itutino malosi o lo tatou Malo.

Lau Afioga e le toe faamatala, o le Tafatolu Fefaatauagai, Vafealoaloai, Fetausiaai ae le Feaiaai. E le au foi le pule ao i le pule po, e le sopo foi le tai i le eleele, a o le vanonofo ma vatapuia, o lea ua vaaia i le taeao lenei. E momoli

la le faafetai ma le faamalo. Afai o le faatofalaiga lenei a le Ofisa o Faamasinoga, faafetai, faafetai i le tofa ae, faafetai i le Afioga i le Faamasino Sili ma le Ofisa o Faamasinoga, aemaise le Pulega i le mataala i le tuuina mai o fautuaga i le Kapeneta e toe liuliu le tofa i le Komisi Faapitoa lenei e faafoefoeina uma mataupu e faatonutonufolau finagalo ma ni manatu ma ni lagona i le Faamasinoga a Samoa.

Lau Afioga i le Fofoga Fetalai e le o lilo, silasila aso uma, taimi uma, le fai atu ma le fai mai o le atunuu i faamasinoga, e le gata i faamasinoga i soligatulafono, a o le fatu a Samoa o le Faamasinoga o Fanua ma Suafa, aso uma, aso uma, taimi uma. Ona lagona lava lea o le lagona lagolago i le Tulafono Tau Faaofi lenei. Atonu o i o le a maua ai le mapusaga o iuleo lea e oo mai i le taimi lenei i le Maota. O iuleo foi o le tagisa ma le leoleoa ma le lē mapu o le atunuu, o le sailiga o mea nei o pule, pule o fanua, pule o suafa, faamasinoga i le va o aiga ma aiga, vafaafeagai ai o le nuu i le nuu. Ae afai o i o le a maua ai se faamamaavega lau Afioga i le Fofoga Fetalai, ia a mea o ula ia, ina ia mafai ona tatou agai e matimati ma ave le fesoasoani sili i lenei Itutino o le tatou Malo, e faaauau ai le galuega.

Faafetai i le tofa na ae i le fuataga lenei o le Tafatolu. Fai mai le mau a nisi o le aupopoto o le atunuu, the most stables stool, is the stool with three legs. O le nofoa e pito sili ma sagatonu lona mausali, o le nofoa e tolu ona vae vaeane le Tafatolu o Faigamalo. O lona uiga, o le taua lena o galuega a le Maota Fono, o le matimati ma ave le fesoasoani e talafeagai mo le Tafatolu lenei. Leaga o le Tafatolu lenei e agai i ai le faafoafoaga ma fuafuaga alualu mamao a lo tatou Malo mo le lumanai, a vaivai i fesili i, a faaletonu i matimati i, a lape i faasao i, o le agaga lena lau Afioga i le Fofoga Fetalai. O le faataua o le auaunaga a le Faamasinoga, o lena e fai atu, a e faaletonu mai i tai i le iuga o le faamasinoga i lou taimi o oe o le sao o le aiga, a e faaletonu e faaletonu uma lava isi tupulaga e lei fananau mai. O le eseese lena o le mea lea. Leaga e taunuu loa i le apili mulimuli, e le toe i ai se togafiti. O le itu taua lena e tataua ona matua mataitu lelei, ina ia sao, sagatonu ma amiotonu faaiuga e filifili i ai le Matagaluega o le Ofisa o Faamasinoga. O le ala foi lea lau afioga i le Fofoga Fetalai, e leai lava se faiva e aunoa ma se maumau. Atonu foi e i ai taimi e luga lalo, misi le vaai lape le faautautaga, a o la lava e silasila le Atua i le tagata ma lana galuega. E le faigofie foi, e le faigofie leaga e aiga uma le atunuu. O le mea lena e tele ina tolopo, taofi ua le iloa po o ai o le a faia, e o uma i le upu lenei o le piitaga ma le sootaga o tagata. Ae faafetai ia i latou o e na faia le galuega i lenei fia tausaga, leaga o le latou tautoga tuuoti lea i luma o le Atua, ia faia le amiotonu. E faigata foi la i nisi o taimi ona fesiligia le amiotonu o faamasino, aua foi e toatasi lava le tagata na te iloa le amiotonu na o le Atua.

Ae ua ou manatu ma le agaga mauualalo i lenei taeao e avatu ai le lagolago 200% a lenei itumalo, fai se Komisi lelei e fesoasoani i le Matagaluega o Faamasinoga i le latou foi pito laau. O le ala lea lau afioga i le Fofoga Fetalai, momoli atu moomooga alofa, faaauau pea galuega lelei o lo o fitaituga i ai nei itutino mavae ma le aoga o lo tatou Malo.

O le agaga lea ma le faaaloalo manuia le Fono.

FOFOGA FETALAI: Malo faafetai. O lea lava e maua le avanoa. Se i tulai mai le sui usufono mo Salega Sasae.

Tofa OLO FITI AFOA VAAI: Faafetai i lau Afioga i le Fofoga Fetalai, faafetai o lena ua sao lelei le tauga o le sui usufono mo Salega e le o le OLP. Lau Afioga i le Fofoga Fetalai, e 200% o le lagolago a le sui usufono mamalu, ae 250% ia ua. E mafua ona ou lagolagoina le Teuteuga lea o le faavae lau Afioga i le Fofoga Fetalai, ua ova ma le 50 tausaga o tauave lava e nai toeaia e toatolu, tautala ma le faaaloalo i le Komiti mamalu. Ae o le mea sa sau ai, a filifili e le Komiti lea a tatou Faamasino ona lipoti lea i le Peresetene o Fanua ma Suafa. I lau tilotilo i ai e pei e le i talafeagai le vaega lea. Faafetai o lea ua aumai le Teuteuga o le Tulafono, o lea ua saofai ai ma le Peresetene o Fanua ma Suafa i totonu e avea ma Taitaifono. O le isi vaega lea, sa i ai lava lau research sa fai i nai tausaga ua tea. Sa ou taumafai ai e maua mai se faaiuga o a latou fonotaga ou te fia malamalama i ai, i se mataupu sa ou fia maua. Ae o le upu sao lava lau Afioga i le Fofoga Fetalai, e fiu e sue se faamaumauga o a latou fonotaga. Ae o lea ua ou vaai atu o lea ua i ai le failautusi, o lea faatoa maua nei i i, aua o lea ua faamaumau o lea ua i ai le failautusi e faamaumauina ia vaega ia.

Ou te tatalo atu i le Komiti fou, ma ua fou le Komiti, na ona toe silasila ifo lava i le tulafono ma faiga faavae a le tatou faamasinoga. Lea latou te pulea ai i le tofiaina o matai o aiga, i le tulaga lena. O le mea lea a o atu ae tofi mai, ua lava matai e lima a outou, o le isi vaega ua lava outou i matai e tolu. Lau Afioga i le Fofoga Fetalai, ou te tautala lava ma le agaga faaaloalo, atonu e le o se mea talafeagai, i le tofia mai e le Faamasinoga o Suafa ma measina a aiga.

E pei o lau tuualalo atu lena i le Afioga i le Palemia i le Tulafono. Faafetai.

FOFOGA FETALAI: Malo. Masalo o le a tali le Malo pe a foi mai i le malologa. E i ai se isi sui usufono e fia saunoa?

Afioga Sulamanaia Fetaiai Tauiiili Tuivasa (Vaimauga Sasae): Lau Afioga i le Fofoga Fetalai. E tulai lava i le ava ma le faaaloalo...

FOFOGA FETALAI: Faamalulu atu i le sui usufono, e toatolu outou lea e tutulai mai e fia saunoa i le mataupu lena. O le a maua lo outou avanoa pe a talii mai i le malologa. Ma lou faaaloalo.

Na faataatiaese felafolafoaiga a le Fono Aoa mo lana malologa masani i le itula e 10:43 i le taeao ma toe faaauau i le itula e 11:33 i le taeao.

FOFOGA FETALAI: Ou te faasilasila atu ua toe amatalia Taualaumaga ma Galuega a le Fono Aoa Faitulafono.

E faia le tatou malologa, ua maea le saunoaga a le sui usufono mo Salega Sasae. O le avanoa lena ou te tapa ma le faaaloalo lau Afioga i le sui usufono mo Vaimauga Sasae.

Tulai mai le sui usufono mamalu.

Afioga SULAMANAIA FETAIAI TAUIIILI TUIVASA: Masalo o lea ua maea ona paleauau foi le taliga o le sua i lena taeao i lena itu o le Maota i le afio a lau Afioga i le Palemia, o le Taitai o le Malo, Afioga foi i le Sui Palemia, le Kapeneta ma Minsita Lagolago, faapea foi i lena itu o le Malu, i

le afiio atu o sui usufono a le Palemene o Samoa, aemaise foi le afio o lau Afioga i le Fofoga Fetalai, Sui Fofoga Fetalai, aemaise le paia o Faauluuluga o Matagaluega a le Malo ma Faalapopotoga Tumaoti, le atunuu o lo o tapuaia la tatou Fonotaga i lenei Maota.

Ae le i faia se sao o lenei itumalo o Vaimauga Sasae, ou te faatalofa atu foi i le tapuaiga a si ou itumalo o Vaimauga i Sasae o lo o tapuaia le faiva o lo outou sui usufono, ia tapuai maia ma le manuia.

Lau Afioga i le Fofoga Fetalai, e ui lava i Tulafono uma ua tuuina mai i lenei Maota, e le fia faaalua i ai se finagalo o lenei Nofoa, e pei ona i ai mataupu ia na talanoa nei i le taeao e pei o le tapaa ma mea faapena. Ae oo loa i ooga o le Tulafono e pei ona aafia ai le faavae o le atunuu. E pau lava lea o le mataupu e fia pese ai le sui usufono mo Vaimauga Sasae. E matau lava ma le totoa i lenei taeao ia saunoaga foi a nisi sui usufono i lenei foi itu, e tai 200% le lagolago tai 250% le lagolago. A o le sui usufono mo Vaimauga Sasae, e le oo i se 40 le lagolago a lenei sui usufono. Ona o le a? ona o le tele o mea e fia talanoa i ai lenei Tulafono Tau Faaofi.

O le mea muamua lau Afioga, e faafetai lava i le tama o le atunuu e ona le tulafono aemaise o lana Minisita Lagolago. Aemaise foi o lena itu o le Maota i le Sui Palemia ma le Kapeneta, ona o lo outou mataala ma lo outou naunau aua se lumanai o Samoa ma ona tagata. Tou te le fefefe lava e fai suiga, ona o le a? O se manuia o Samoa ma ona tagata. O le taimi a o le i ulufale mai lenei sui usufono i le Palemene, na ou faalogo a o lote le Faavae. Ou te faalogo e pei se taugapelu e faalogo atu i ai i lenei Maota i le faalogologo mai o le atunuu. Ae a lenei vaitau?, o lo o malu pea lenei Maota i le taitaiga a lau Afioga i le Fofoga Fetalai. Faamanuia le Atua ia te oe, faafetai foi i le sui usufono o lenei itumalo ua maua mai ni tama matutua i totonu o lenei Palemene, e faauluilifolau ai lo matou sa mo le agai i luma. A o le Tulafono a lau Afioga, e pau lava sina fesoasoani ma se tuualalo i lau Afioga i le Minisita po o lau Afioga foi i le Palemia ma lau Tulafono. O le tulaga lea o le toe tuuina i totonu o Faamasino ua litaea, lea e i ai le vaega lena. Ou te lagolagoina le toe faaopoopo i ai o nisi sui, ona o le a? E tele faitioga a le atunuu i le vaega o Faamasinoga. O i foi lea, e le ma foi e tautala atu, e o lava isi i le tuugamau e o ma le faanoanoa i faaiuga a le Faamasinoga. Ae ou te faafetai i lenei Paeaiuga ua tatou tagofia lenei vaega aua se manuia o Samoa ma ona tagata.

O lo o gugulu le atunuu i le tofiaina o isi Faamasino se i tulou lava, fai mai e le iloa faalupega o itumalo ma nuu. A o lenei lava Tulafono ua tuuina mai i le toe faaopoopoina o nisi sui, e lagolago e le sui usufono. A o le faaopoopoina, e teena e le sui usufono mo Vaimauga Sasae le sui ua litaea, lea e toe tuu i ai e totonu. E lagolago le tuuina o le Peresetene o le Faamasinoga, lelei, a o le sui lea o le Faamasino ua litaea. O le a toe tuu i totonu ua litaea. O lea e i ai piriota ma tausaga, a oo loa i le tausaga pe 68 ea, ua litaea. A litaea la, ua leai ma se mea e toe mafai, na o le alu lava e fealuai i lana taavale ma vaai lana faatoaga. A o lea o le a toe tuu i totonu, o le popolega lena o le sui usufono mo Vaimauga Sasae. O lea e i ai le tulaga i le Afaigaluega Paia a le Atua, aua a tuu foi i totonu le Faamasino litaea. A o le Faamasino Sili foi o le Faamasino, o lea la ou te talosaga atu ai i le Palemia ma lana Tulafono, faaoga foi nai sui faifeau, le vasega o le Afaigaluega Paia po o le fonu a Ekalesia Aoa, aumai se sui o faifeau i totonu ae aveese ai le Faamasino lea ua litaea. O le teuteuga lena lau Afioga.

O le Ofisa Sili foi o Faamasinoga lea ua tuuina i totonu, e popole foi le sui usufono mo Vaimauga, ona o le tulaga maualuga foi o le Ofisa Sili ua faaao i ai. A o lea e alu atu i totonu ae sau le faaupuga, e le palota ua na o se alu na o se failautusi. E faapefea ona tatou tuumamaina o le Ofisa Sili po o le e faauluulu i ai lo tatou Malo. Ou te tuuina atu foi ma se talosaga lau Afioga i le Palemia, se manaia ae aumai ai i ina ni sui o tina ma tamaitai, faaoga i ai nai fafine nofotane ia fai mai e ita i lenei sui usufono, a o lou flavor lena o nai tina ia. Aumai ai se sui o tina ma tamaitai e faafailautusi. E pau lava lena o le teuteuga o le Tulafono, e tatalo atu ai i lau Afioga e ona le Tulafono, ina ia fai ni suiga. Aveese le Faamasino Sili ua litaea, ae aumai nai faifeau, aveese le Ofisa Sili o Faamasinoga pe a le aoga lana palota, ae aumai ai se sui o tamaitai. Manuia le faafofoga a le atunuu aemaise lau Afioga i le Fofoga Fetalai ma lena itu o le Maota.

FOFOGA FETALAI: Tulai mai le sui usufono mo Alataua Sisifo. Masalo e toe pau lea o le sui usufono e fia saunoa.

Afioga ALIIMALEMANU ALOFA TUUAU (Alataua Sisifo): Faafetai mo le avanoa. E faatalofa atu i lau Afioga i le Fofoga Fetalai, faapea foi sui mamalu o lenei Palemene. Ae le gata i lea o auaunaga eseese o tatou faatasi i lenei itula.

Ona o au le isi sa i le Komiti lea sa i ai le Lipoti lea ua talanoaina, sa leai se manatu e tulai, aua o la matou fautuaga lea. Ae e faale logomalie le faapea o le i ai faapitoo o se sui o tina i totonu. Aua i lou lava talitonuga i le tusiga o mea nei o Tulafono, e tusi i le agaga singular, tusa o na e aafia faatasi tama ma tina. E i ai lou talitonuga o le Peresetene o le Faamasinoga e mafai foi ona tina. O le Faamasino litaea o le Resitala o le Faamasinoga Sili e mafai foi e se tamaitai. E le auai la lou taofi i lea tulaga, aua e mafai ona matou oo uma lava i tulaga ia e lima e tusia mai i le Tulafono. A o le agaga o le lagolagoina atili o le...

Afioga Sulamanaia Fetaiai Tauiiili Tuivasa: Lau Afioga i le Fofoga Fetalai na o se mea lava e faasao. Vaeane le saunoa o le augafaapae o lenei Maota.

FOFOGA FETALAI: Malie le sui usufono. Faapuupuu mai le saunoaga.

Afioga Sulamanaia Fetaiai Tauiiili Tuivasa: E lagona lava le faanoanoa, o lea ua saunoa foi, ae sa le tataua ona saunoa o ia lea sa i totonu o le Komiti lea. A o lea foi ua saunoa ma aumai lona finagalo. I le manatu lava o Vaimauga Sasae ia, e pei ona ou fai atu, aumai pea le tali i le la itu, a o lenei lava e fai ma tali mai si ou tuafafine, se ou te faamalulu atu. A o ia foi o le tina a o lea e tetee i le tofiaina o tina, lea e promote atu e le sui usufono mo Vaimauga Sasae a o ia o le tina.

Afioga ALIIMALEMANU ALOFA TUUAU: Lau Afioga i le Fofoga Fetalai e leai se feteenaiga e faia i lea tulaga. E pau le mea lea e fia faamalamalama i le sui usufono, a tusi mea nei o Tulafono, e tusi i le gagana e tasi lava i tama ma tina. E pei la o lau tala lea e tau fai atu, o le Resitala o le faamasinoga, o le Loia Sili o le Faamasino Sili o le Peresetene e mafai foi ona tina. E pau lena o le mea sa fia faamalamalama atili. A o le tulaga i le Tulafono,

o le tulaga lea o le lagolagoina. I le tulaga ua laga ai le tofiga lea o le Faamasino litaea o le Faamasinoga Sili. Na tele ni lagona ma manatu na faaalua i ai, ae peitai o le lagona foi lea e tatau ona umia e e ua masani i le vaaiga faale-atunuu, e sa masani ona tovaa atu i ai le atunuu i le tulaga o le faatinoina o ia galuega. E pei o le agaga lena o lea na i ai se taofi i la matou Komiti, ina ia tuuina pea i ai ia le Faamasino ua litaea ina ia toalua ma le o lo o umia le nofoa, ona o laua uma ia ua masani i le vaaiga lea faale-atunuu. Ma le Resitala o le Faamasinoga, e tatau lava ona i ai se isi e tapenapenaina ma fai ma failautusi, o lea e le tatau ona equal number, ona tutusa ia fuainumera ia e ono. Afai e fai i ai a latou palota ua faigata ona fai se faaiuga.

O le fesoasoani atu lea faatasi ma le lagolago a lenei itumalo. Faafetai mo le avanoa.

Afioga Fuimaono Teo Samuelu Teo (Falealili Sasae): Lau Afioga i le Fofoga Fetalai....

FOFOGA FETALAI: Malo faafetai. Masalo ua maea ai i i sui usufono e fia saunoa. Ma ou te fautua atu i sui usufono mamalu, o lenei mataupu e ave ma maafuagalu le Lipoti a le tatou Komiti a le Palemene. Na ona faamanatu atu le itu lea, ia ona avanoa loa lea o sui usufono mamalu e ave i ai o latou finagalo, ina ia faapena ona maua avanoa. O lea la pei ona faafofoga foi i le tulai mai o le sui usufono o Alataua Sisifo, ia o se tasi o sui o le Komiti o le Komisi o le Palemene. E maitau atu i le tulaga o finagalo pei e eseese lagona ua toe faaalua mai, e le afaina, ae na ona faamanatu atu ina ia aua ne i toe....e le faigofie i le faafofoga mai a le atunuu lea tulaga, le toe fetagaai o finagalo o sui usufono mamalu o le Palemene, ui o lea, afai lava o naunau le sui usufono e fia....e ese se isi mea mai mataupu sa laga, ia o le a tuu atu le avanoa, afai e leai o lea e tagatasi lava saunoaga, e sili ona faasee e tali le Malo.

E i ai se isi mea e ese ai Falealili?

Afioga Fuimaono Teo Samuelu Teo: Lau Afioga i le Fofoga Fetalai e faamalulu atu ona o le tulaga lea e le i ai lou sui usufono i le tulaga lea sa aafia i le talanoaina o le Tulafono lenei, e silafia o lea sa i ai le faafitauli tele i Luatuanuu sa poloka ai le auala ma toe ui mai ai i le isi pito e taunuu mai ua maea le Tulafono lea. O le ala lea o le tau fia saili atu o se avanoa, e tasi lava le fautuaga lau Afioga i le Fofoga Fetalai, ae lagolagoina le Tulafono Tau Faaofi e pei ona tuuina mai.

FOFOGA FETALAI: Ia e lelei pe a tagatasi, ae na ona faamanatu atu, e manatua foi ua uma ona pasia e le Maota le Lipoti a le Komisi Suesue a le Palemene lea sa fai fuafua i ai pei ona ou fai atu o lea e maa faafuagalu mai lagona ia ma fautuaga, ae faamanatu atu ou tem usu e fautua atu a o faafofoga tapuai Samoa, ina ia manino i sui usufono e maitau le tulaga o tatou galuega, faamolemole. Tulai mai le sui usufono.

Afioga FUIMAONO TEO SAMUELU TEO: Lau Afioga i le Fofoga Fetalai ma le faaaloalo lava e fia faaaogaina lou avanoa i le Tulafono Tumau e faaalua ai lagona. Ae talitonu lava o lea ua malu le fau i le tapuaiga ma saunoaga foi a nisi ua tuanai. E lagolagoina e Falealili Sasae le tofiaina o le Komisi lenei, nap au lava le agaga tuualalo, ua le na ma le laina ia nisi o faitioga aemaise o

tulaga ae pei ona tuuina mai e ala i le faatuina o le Komisi pei ona susesueina mataupu tau le faa-Faamasinoga. A o le tuualalo a Falealili Sasae i le Komiti lava lea e faaopoopo i ana galuega faatino, pe a tusa ai ma le finagalo o le Minisita ma le Tulafono, ia aua ne i tuua se i oo i le 68 le tausaga e litaea ai po o le 70, ae ia i ai se piriotia ina ia sailiilia ai pe fai valuations o performance a Faamasino, aua a i ai le Faamasino pe i ai foi le Sui Peresetene e faatautaia Famasinoga e lotea measina a aiga, e le faamaoni, aua le tuuloa se i oo i le taimi e litaea ai, a o le taimi lava e mataituina ai e le Komisi lea, ua tatau loa ona faia i ai le fuafuaga ma ave i ai lona iuga. Ma le faaaloalo lava, e pau lava o si mea na tau fia momoli atu le agaga faafetai. Ia manuia lau Afioga i le Fofoga Fetalai.

FOFOGA FETALAI: Faafetai. Masalo ua maea ai i sui usufono e fia saunoa, ae tuu atu ia le avanoa i nisi o mea sa laga pe i ai se finagalo o le Malo e fai i ai sana saunoaga e faamalalamalama.

Tulai mai lau Afioga i le Palemia.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai ou te faafetai atu i sui usufono sa saunoa i le Tulafono Tau Faaofi lenei, ma ua toatele foi sui usufono na saunoa umi foi a outou saunoaga, ma e tatau ona o le Faavae lea ua lotea. Ua uma foi ona ou talanoa atu i le tulaga o lenei Teuteuga ia e afua atu lava i le Maota lenei, ma e o le tulaga lea, e taua tele. O lea foi sa aumai i le saunoaga mulimuli, a oo lava i le tulaga e matau ai e le Maota ua le faia galuega a le Faamasinoga, o iinei e maua atu ai ma le iuga. O lona uiga, e mafai ona faamalolo e le Maota lenei i le lafo e faatu ia ma lagolagoina ma palota i ai le silia i le ⅓. O lona uiga la, e taua tele i le Faamasinoga ona faafogafoga lelei i le tulaga o le liliuga o le tofa i Taitai o le atunuu aua e leai foi nisi o toe i silī, o lea ua i totonu o le Maota lenei Taitai o Samoa. E ao ai ona faautagia ia le mea ua fulisia i ai finagalo o le Palemene lenei. O le ala foi lea afai e teuteu se tulaga ogaoga i totonu o le Faamasinoga ona o le amanaia o le itu lea o le feavatai ma le faafeagai ai o le itu tutoatasi o le Faamasinoga, le Palemene ma le Executive le Pule Faatonu e ogaoga le tulaga a oo i ai le Palemene lenei, ona mafai loa lea ona aveese e le Palemene lenei. O le ala lena e taua tele ai ia saunoaga ia ua aumai e faaali ai atugaluga i le Faamasinoga ma le faatinoina o latou galuega. O le tulaga foi lea atonu ua laaloa i le Faamasinoga i le taimi sa faatino ai le galuega a le Komiti, ua matua laaloa ai le itu lea ina ua valaauina e le Komiti ia le Faamasinoga ae fai le latou tonu e le omai. A na faapea la e tulituliloa e aveese le tulaga feavatai na i ai i le Komiti, ae tulituliloa le latou samania ae le usitaia, o iinei i le Maota e fai ai ma lona faaiuga. O le tulaga lena e matua matautia le paoa lea e i totonu o le Palemene. Ia ae o lo o i ai foi i le Palemene le tulaga ina ia matua faaeteete i le faaaogaina o le paoa lena, ia matua faaeteete, e faatoa liliu lava i ai, i le taimi e matua atagia ai lava se tulaga faaetonu ua oo i ai le Faamasinoga. O le mea la lea, e faapena le faaeteetega, e tatou te faia faaiuga ina ia aua ne i atagia ua tatou faaoga sese ia le pule. O lea la ua tea atu si vaega lea, se i fai lava sina au tala ona o lea sa aafia i saunoaga i mea nei o nofoa. A manatua i se taimi pei lava o le tausaga lea na ou nofo ai i le nofoa lea e fa vae, ou te faalagolago atu i tua ae masii i luga vae e lua ia e i luma o le laki lava, e moni lava na tau lou ulu i

tua, ae le i tau tonu i le mea e maai ai ia le nofoa lea e tuu mai tua po o le kesi lea e tuu mai tua. E le na o au na pau i le mea lea. E tau mai ai i ina, e oo foi i le nofoa e fa vae, e masipasipa-gofie, o le fautuaga, se i tilotilo ane lava pe tatau ona ono vae pe valu vae o tatou nofoa i le Palemene i te'i ua maumau se ola o se isi, a o le nofoa e aupito sili ona faaletonu, o le tolu vae, ae leaga o au e i ai ia sauaga, o le nofoa aupito sili lena, ona aua ne i vaaia i totonu o le Maota lenei e maumau ai le ola o sui usufono. O lea la ua tea le tulaga i nofoa ma o latou vae.

A o le a ou liliu atu i tulaga o le tofi o mea nei o Faamasino o lea e laiti pe talavou, aua le aumai ai ni Faamasino ua toeaiina ua litaea ua le toe aoga, pei o le manatu lea. Ae ia outou manatua foi, e i ai le upu e ave i e matutua, o le tele o tausaga o le tagata o le soifuaga lea ua tatou i ai, o le tele foi lena o le iloa, o le tele o le soifua o tausaga o le tagata, o le tele foi lena o lona iloa. E ui lava la ina faapea, ua muta i lalo o tatou tulafono ae le mafai ona aveesea le tele o le poto masani lea e i ai. O le ala lena o le faataua ua faalitaetae ae la e tele lava le poto masani la e i ai. O lea ua litaea le isi Faamasino a tatou ona o tatou tulafono o la ua Faamasino nei o Faamasinoga o Talosaga a le Malo o Niue, ma e tau mai ai i ina le amanaia e lea foi Malo, o lea foi Faamasino. O lona uiga, e tele lava le aoga. A o le mea e aupito sili ona liolio i ai o faaiuga fai a le tatou Faamasinoga o Fanua ma Suafa. E i ai taimi e oo ai ia mataupu nei i le Faamasinoga Mauualuga, pe afai ua alu alu alu le Faamasinoga foi a Fanua ma Suafa, ona tulai mai ai lea o se mataupu ua le maua se tonu i i, ae tatau loa ona ave i le Faamasinoga Mauualuga, o i la e saofafai ai la ia tama la ia. O se mea foi lea tuuaia ua feteenai ai ia talitonuga feteenai le faamaoni, ona afai e saofai ai i se Faamasino la foi e faamasino i o, ae o lea o le a toe avatu i o i le Faamasinoga Mauualuga, lau Afioga o le mafuaaga lena, e le i soona te'i la ua aumai le fautuaga lea a le Kapeneta e liolio i le mea lena o le Conflict of Interest, lea foi e mafua ai ona faamavae ese se Faamasinoga o Fanua ma Suafa pe afai o la e aafia i se Faamasinoga. A saofai ai la le Faamasino i i i totonu o tofiga ua matua aafia ia le Faamasinoga Mauualuga. O le ala la lena, e tatau ona taataa mama o le faatinoina o tatou faaiuga.

Lona lua, e toalua a tatou Faamasino lea ua i ai nei ua litaea, ae a tuu i ai ma isi Faamasino ua litaea Samoa la e i Niu Sila, ua toatele e mafai ona tatou faaagaina. Ae le iloa pe oo i le tausaga lea ua tolu, tausaga atu ua fa, lima, ono, fitu, valu, a o le mea matautia i le toalua lea e i ai nei, o lea e saofai ai ma le Faamasino sa faamasino i le Faamasinoga Mauualuga a le Lalolagi i Mataupu Tau Solitulafono. O le Faamasinoga lena e le i leva ona faatu ae filifilia ai ia le Samoa, e leai ma se Niu Sila na filifili i ai, leai ma se Ausetalia na filifili i ai, e oo i le vaega lenei o le Pasefika, e leai ma se isi na filifili i ai, ae filifili i ai le Samoa lea e toatasi. O lea foi la ua litaea ma ia, tasi lena Faamasino e fesoasoani i le mataupu lea. O lea lau Afioga i le Fofoga Fetalai, o lona uiga, e matua loloto le Faaiuga a le Kapeneta e le i soona faia.

O le mea lea ou te faamalo ai i le Afioga i le Minisita o Faamasinoga ma Pulega Tau Faamasinoga, o ia lena na amatamea mai i le Tulafono lenei, ia ona aumai loa lea i totonu o le Kapeneta e faamaonia e le Kapeneta, ona aumai ai lea i lalo i i lalo o au o lou igoa, e leaga a oo loa i mea tau Faavae, ia ona sau loa lea i lalo o le Taitai o le Malo o le Atunuu, ona e le mama le mataupu lea. O le ala lena, ou te faafetai ai ia le Minisita o Tulafono i le lototele i le aumai o le Tulafono lenei ma lana aufaigaluega, e faafetaia foi le Kapeneta i le mamao o le faatofalaiga. O lea la e mafua ai le Tulafono. Ae i ai la se faafetai e ave,

ave i le Minisita, ave i le Minisita e ana le Tulafono ma momoli i le Kapeneta ia mamao le latou tofa sailimalo, aemaise le Palemene lenei, le Komiti sa latou iloiloa ia le lafo ia ma le fautuaga, lea ua taoto nei i lumamea.

Lau Afioga i le Fofoga Fetalai, o le itu lea i le tuu i ai o se faifeau, ia ua tatou iloa lelei lava o le tofi lava o le faifeau ia mai le Atua, o lana Tusi Paia, na o le Tusi Paia lava na tofi i ai le faifeau, aua le aumaia fua le faifeau e faaeleelea i i mea a tatou o lo o fai nei i le lalolagi, o mea faalelalolagi ia tatou te talanoa ai, o le Tusi Paia ma le talaiina o le Talalelei o lana ia lena matafaioi, aua tatou te....E i ai le upu e fai i faifeau, 'aua e te toe tepa i tua i le suotosina,' a na faapea la e loloto le mataupu silisili a le sui usufono o Letogo, e le oo i ia mea, o le mea lena e fai ai ma e talatalanoa i lau Sui Minisita e fealuai lava ma le Tusi Paia i taeao uma taeao uma taeao uma, semamanu e loloto ai foi lau faatofalaiga i le mataupu lea o le suotosina, a oo loa i mea ia, aua ne i toe vaai agai i tua....

Afioga Sulamanaia Fetaiai Tauiliili Tuivasa: Lau Afioga i le Fofoga Fetalai...

FOFOGA FETALAI: Onosai mai le sui usufono, saunoa lau Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neiote Aiono Galumalemana Dr. Sailele Malielegaioi: O le fautuaga lena, ae oo loa i mea faapea, talanoa loa i lau Sui Minisita. Ia, o le tulaga la lena, o le sui foi o tina, lea ua sao le faatofalaiga, sa tulai atu ai le sui usufono o lena Itu.

E i ai taimi e tusi ai Tulafono, ona faaaoga lea o faaupuga, po o le He, ae o lena e tau ai i totonu, a faaaoga le upu lena, e faasino uma po o le a lava le gender e tusi ai, e faaaoga lava e faasino i le tamaitai, e faasino i le alii. Ae o le tatou atunuu, o le ua aia tutusa uma lava tina ma alii. O lona uiga, e leai lava se mea e tau tau ai fua, ae o le ala lena ua ou alofa atu lava i le sui usufono, ona o le tulai ae ae o lea e aumai se tasi o fautuaga, e ese le mamao mai le tina na saunoa nei o le sui usufono o le Palemene nei, e aumai ai le faasaoga o le sao lava o lona ia sui usufono, e le o faapea e faatautee atu i le finagalo o le sui usufono na faaalua ae o le tulaga sao lena. I nei mea o Tulafono po o le a lava le... pe faaaoga le masculator in gender, ae o le tulaga foi e faasino foi i tina. O lona uiga la, e leai lava se tulaga foi lea e faasinolima pe faimefa faapito i i, i le lē amanaia o tina.

O le i ai o le failautusi, e pei o le agaga foi lele o le faamaumau, o la e aumai aloaia, e ala ona leai se palota, ona e i ai itu maotua o mea nei o le aafia o le CEO i tofiga. Ae manatua foi o tofiga o tofiga o Faamasino. E pei la o lea e maitau mai i lalo o le Faavae, a oo loa i tulaga o Faamasino, e tofi sao mai lava e Le Ao o le Malo, e oo lava i le Kapeneta e ave sao lava i Le Ao o le Malo, ina ia aua ne i tuuaia ua faapolokiki tofiga o i latou o Faamasino. Ia e faapena foi la i le mea o le maaaleale o mea nei o tofiga faa-Faamasino, e le tatau ai ona faia se palota a le CEO o le Faamasinoga i tofiga ia, ona e i ai le vatapuia, le vafealoaloi, le va o le CEO ma Faamasino e le talafeagai ai ona aafia le CEO i le tofiga o Faamasino lea e tofofi e faatino le latou galuega faa-Faamasino.

Lau Afioga i le Fofoga Fetalai, e pei ua maea uma mataupu ia sa laga, ia a o lena ua maitau mai, o le tulaga lea ua oo i ai le Tulafono Tau Faaofi. E i ai foi

finagalo ia sa faaalua e faatatau i le oooo o le leo o Faamasino i le tofia o mea nei o matai o aiga, e taua tele le manatu lea. Atonu o le manatu e toe tilotilo foi i ai i se isi teuteuga, ae pau lava le mea e faaeteete i ai, ina ne i te i ua tatou aafia i le tulaga o le faatinoga o le galuega ma faaiuga faa-Faamasino ae se i tilotilo i ai i le tulaga o le faatinoga o a latou galuega, pe ono aafia le latou tutoatasi i se fautuaga faapea, ae lafo mai le finagalo ua faaalua.

Lau Afioga i le Fofoga Fetalai, o le faamaninoga na o mataupu sa laga e sui usufono sa sausaunoa i lenei Tulafono Tau Faaofi.

FOFOGA FETALAI: Malo faafetai.

Na faamaonia le lafo ma faitauina le Tulafono Tau Faaofi o Teuteuga o le Faavae (Nu.2) 2018 i lona faitauga faalua.

FOFOGA FETALAI: E tusa ai ma le Mataupu 109 o le Faavae, o le a tuuina atu le Tulafono Tau Faaofi i le Komiti o Tulafono Tumau, Mataupu tau Faiga Palota, Talosaga ma Tofiga faale-Faavae mo le iloilo ina ma toe lipoti mai i le Fono Aoa ia le ititi ifo i le 90 aso mai le aso lenei.

TULAFONO TAU FAAOFI O LE KOMISI O FAIGA PALOTA 2018 – faitauga faalua

Afioga Hon FAAOLESA KATOPAU T. AINUU (Minisita mo Faamasinoga ma Pulega Tau Faamasinoga ma le Komisi o Faiga Palota): Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o le Komisi o Faiga Palota 2018 i lona faitauga faalua, ma ou te fia tautala faamalamalama i ai.*

Faaluaina e le Minisita mo Aoga, Taaloga ma Aganuu ma le Minisita mo Fesootaiga, Faamatalaga ma Fesootaiga Vavave Faaneionapo.

FOFOGA FETALAI: Ou te tapa lau Afioga e te saunoa faamalamalama.

Afioga Hon FAAOLESA KATOPAU T. AINUU: Lau Afioga i le Fofoga Fetalai ma le mamalu o sui usufono, o lenei Tulafono Tau Faaofi ua tuuina mai ina ia faavaeina ai le Komisi o Faiga Palota faapea matafaioi ma tiute o le Komesina o Faiga Palota faatasi ai ma lana Matagaluega. Ua faia lenei tulaga ina ia faavaeina ai le tutoatasi o le Komisi ma tuuina faatasi uma ai mataupu e patino i le Komisi o Faiga Palota sa tuuina i lalo o le Vaega 3, 3A, 3B o le Tulafono o Faiga Palota 1963. O le a maioio ai le Komisi, le Ofisa, ona tiute ma faiga faavae, faatinoga o faiga palota e pei ona patino i ai Tulafono o Faiga Palota.

O le sini atu lava o lenei Tulafono Tau Faaofi, o le faavaeina ai ma aiaia ai le tutoatasi o le Komisi o Faiga Palota, tofiaina o le Komisi o Faiga Palota ma lana afaigaluega, aiaia mai ai faavae ma faavaeina ai le tulaga o filifiliga,

faaleaogaina, faamavaega ma avanoa o tagata faigaluega o le Komisi o Faiga Palota.

Ae i ai foi le pulega ma tulaga o mea tau tupe o faiga palota, filifiliga o Komiti Faafoe ma le toe iloiloaina o tuaoi palota pe a talafeagai; ma le mulimuli; soloia o le Vaega 3, 3A, 3B ma le 4 i le Tulafono o Faiga Palota 1963.

O le faamalamalamaina manino lea lau Afioga i le Fofoga Fetalai o le tuuina mai o lenei Tulafono Tau Faaofi, ina ia faatulafonoina ai le faavaeina o le Ofisa o Komisi o Faiga Palota ina ia manino ai ona tiute, matafaioi o le Komisi i le tofiaina o le Komesina, le Pulega ma le aufaigaluega. I le ava ma le faaaloalo.

FOFOGA FETALAI: Malo, faafetai. Ia, e i ai se sui usufono e fia saunoa?

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai e...

FOFOGA FETALAI: Ia tulai mai le sui usufono mo Anoamaa Sisifo, lau Afioga i le Matua.

Tofa Hon LAUOFO FONOTOE NUAFESILI PIERRE LAUOFO: Faafetai. E pupuu lava foi nai manatu e fia folasia i le Maota nei e tusa ai ma le Tulafono Tau Faaofi ua faapena ona tuuina mai e le Afioga i le Minisita. E momoli atu le faamalo, e faafetai foi i le Afioga i le Minisita i lenei tapenaga, ua manino foi lana saunoaga i vaega eseese. E pau lava ia o nai manatu e faataatia atu i autafa o le Afioga i le Minisita, o le taimi po o le umi lea o le konekarate e galue ai le Komesina, pe i ai se lagona foi lea e tataua ona sili atu i le 3 tausaga. O lea e manino ma malamalama e pei o le taimi lava lena o lea e laugatasia uma ai taimi galulue o Faauluuluga o Matagaluega.

Apeitai, e faavae sou manatu ona o le taimi foi lea o Paeaiga e tai 5 tausaga ona e i ai se lagona e manaia foi lele ona sopoia atu le isi faiga palota po o le isi Paeaiga i le taimi galue a le Afioga i le Komesina o Faiga Palota.

E faamauina le faafetai, o lea ua faatulai mai i totonu o le Tulafono Tau Faaofi le Komiti lea e toe iloiloaina tuaoi o itumalo faa-palota ma ou te talitonu foi o se laasaga lelei lea mo le agai i luma. Ae pau lava se lagona e fia faaleo i le vaega lea lau Afioga i le Minisita, e manaia foi lele pe a faapea e taua ai.. e lelei lava le fonu pea pe a feiloai le Komiti lea a o lumanai ai le faiga palota faapea foi le taimi e tuana'i ai le faiga palota. Ia pe leai lava se suiga o tuaoi, ae tau lava ina toe silasila i ai aemaise lava taimi e maea ai le faiga palota, ona o lea e aumai foi lea e le o faailoa mai se taimi e feiloai ai ma tulaga faapena.

E pei o le uiga lena o se lagona lau Afioga i le Fofoga Fetalai, ia e manaia lava a uma le faiga palota ma toe silasila i ai ia po o talafeagai po o lelei, pe toe fai foi nisi teuteuga. Ae faafetai mo le avanoa i lau Afioga.

FOFOGA FETALAI: Malo faafetai. Oi se matua lelei tele. Ia o le a tuu atu la i le Malo e saunoa. E i ai se isi sui usufono e fia saunoa?

Ia, tulai maia lau Afioga i le sui usufono mo Aleipata Itupa i Lalo. Tulai mai lau Afioga i le Matua.

Afioga TAFUA MALUELUE TAFUA: Lau Afioga i le Fofoga Fetalai, faafetai mo le avanoa. E le umi lava se tautalaga i lenei mataupu. E momoli atu foi le faafetai ma le faamalo i le Afioga i le Minisita ona o lenei Tulafono Tau

Faaofi. Ma e sa tele foi lava nai au fesili i le taimi sa fai ai le tatou faatalanoaga i le Aso Gafua, ona o le popolega lava, atonu po o le faatamala lava o le sui usufono ia. Ia e le i faia sau submission i le taimi na avanoa ai, ae ui i lea, ua tuanai na taimi. Ae na o le 3 lava nai vaega ia ou te fia talanoa ai e uiga i le tatou Tulafono Tau Faaofi.

O le vaega muamua, o le vaega foi lea e i lalo sa faatalanoa ai le Vaega 14, e le i auiliiliina le Tulafono Tau Faaofi lau Afioga ae pei o le agavaa o le sui foi lea tagata palota. E pei o le mea lava lea ua fai si mamafa tele i le faalogologo atu, o le le mafai lea ona palota lota uso moni po o lota tuafafine moni po o taita lava siblings pe a faapea e le o au o se sui. O lona uiga e na o le avanoa lava e tuu i le sui e tauva i le palota e mafai ona palota lona... tulou lona toalua, ia faapea foi ma lana fanau, pe afai e le o matai lona toalua i se isi itumalo.

Lona lua lau Afioga, o le a ou alu sese ai ia faapea, a o le a taatia nisi manatu seia oo i le taimi o le Komiti ona faaali atu lea ma le faaaloalo, faafetai.

FOFOGA FETALAI: Ia, tulai maia le sui usufono mo Palauli le Falefa, se tasi o sui usufono matua o lea Itu o le Maota.

Afioga Hon FAUMUINA TIATIA FAAOLATANE LIUGA (Palauli le Falefa): Faafetai atu i lau Afioga i le Fofoga Fetalai mo le avanoa. Faafetai foi i lenei Maota ua tele foi Tulafono ua mafai ona faamaeaina i lenei aso. O le taua ia o le Tulafono Tau Faaofi lea i lou au sui usufono, ona o le vaega lea o Faiga Palota, sa i lalo o le Fono Aoa, ia ma na amata ai lea ona tuufesili lou mafaufau, pe tatau ona tutoatasi lenei Komisi pe leai, pe o lava ni galuega e fai e nei foi tamalii ma alo o le atunuu o faigaluega ai.

E pei lava foi ona maua i saunoaga a nisi o sui usufono na saunoa nei aemaise foi o le faamalamalamaina o lenei Tulafono Tau Faaofi e le Afioga i le Minisita e ona le Tulafono Tau Faaofi, i le tulaga ua mafua ai ona fai lenei Tulafono Tau Faaofi, ina ia mafai ai ona tutoatasi le Komesina o Faiga Palota. Ou te le o vaai atu i i le tulaga tutoatasi i le faafaigaluegaina o tagata, e pei e foliga lava o lea e i lalo o le faamalu a le Komisi o Tagata Faigaluega. Aua silasila foi lau Afioga ma le mamalu o lenei Palemene, ua i ai isi itutino o le Malo ua faamatuu i ai le tulaga lea tutoatasi e filifili ai e le Komesina po o le Pulega a latou lava tagata faigaluega, ona o le anoanoai foi o matafaioi ua feagai ma le Komisi o Tagata Faigaluega a le Malo, ae le gata i lea ua aveesea foi le CEO sa galulue faatasi ma le Taitaifono o le Komisi aemaise Komesina e toalua o lo o lagolagosua. O le tasi lena fesili i le Afioga i le Minisita pe a faamalamalama maioio lelei le upu tutoatasi, e pei o le tutoatasi lea e faitau atu i ai i le Tulafono, i galuega fai a le Komesina i le faatinoina o ona tiute i le tulaga e faatino ai galuega o faiga palota.

O le isi mea lea e le o taua i i, o le malosiaga po o le pule tuuina atu i le Komesina na te faia ai filifiliga o agavaa o sui tauva mo faiga palota. E ala ona ou faataua le mataupu lea lau Afioga i le Minisita, o au le isi sui usufono ua uma lelei palota ia ua tea atu e fa, e le misi ma faamasinoga, a o lea foi ua aumai lau Tulafono, e le gata i le Tulafono Tau Faaofi lea, a o le isi Tulafono lea e mulimuli mai. E le o faaitiitia ai avanoa e uma ae faiga palota, a ua faulalai faamasinoga i tulaga lava o tuuaiga. E te silafia foi nei mea, e uma loa faiga palota faiaina le sui ona i ai lava lea o le loto le fiafia ma taumafai lea e saili ai lea o nisi mea e faaleagaina ai le igoa o le sui ua manumalo. Pei e tasi lena tuualalo, ia i ai le malosiaga i le Komesina e fai ai e ia faaiuga mo agavaa o sui

tauva ma le toe o ai sui tauva i le faamasinoga, e tau mai ai, pe tatau ona alu tauva le sui pe leai. Aua afai na te le faia le mea lea, o lona uiga e le tatau ona Komesina o Faiga Palota pe a leai se malosiaga o i ai, o ia e iai le pule. A alu atu le tagata e fai lana tautoga, aua o le mea lea e i ai, e tauto ae le suesuea. Ou te fai atu lava au ia o au, o le faigofie ia o auala e suesue ai, ae ua o lava i tai ona o le leai o se malosiaga sa i ai. Sa i ai le malosiaga muamua ou te le iloa po ua lua po ua tolu Paeaiga talu ai ae te i lava ua mou malie atu.

Lau Afioga i le Minisita, tasi lena vaega o le taumafai lea o Tulafono, aua o lea o le a faatutoatasi lau Komesina o Faiga Palota, tuu i ai le malosiaga lea, aua lava ne i toe o ai ni sui tauva, po o ai lava i le Faamasinoga, aua o lana galuega lea. Ia e leai se isi e tele ni ana tupe, a o nei foi tupe, se i faaagaaga pe faasoasoa lelei aua nai toeaia ma nai olomatutua o la e omai e saili atu ni tupe e fesoasoani ai i le latou penisione ma tupe e tausi ai aiga ma tautua ai Ekalesia ma nuu. Ma o le tatou aganuu foi lau Afioga i le Minisita, e matua tele o tatou tuatuagia, a o a la tupe o le a fai ai pe a fai o le a ave uma i le faamasinoga? Ia na i ai foi isi tulaga o faatulagaga o totagi o nei mea o loia ia laitiiti, ae leai se laitiiti. Ou te iloa o lau Afioga ma lou ofisa le isi ofisa e masani ona tai \$200 i le \$300 i le itula pe a alu atu le tagata e faaulu lana tagi e ave ai se mataupu i le faamasinoga, ona o le tulaga faanatinati, o nei mataupu. Ou te tau manatua sa i ai foi se faaiuga a le Kapeneta sa fai i se isi taimi e tau faamama ai le pili a loia, a o le mea lea e i ai, e leai lava ma se loia e mama se pili. Ou te iloa e mama pe a na faapea e fai uma e le Komesina o Faiga Palota ma le Loia Sili e faaoga ai o la Ofisa e fesoasoani ai i taitai o le a filifilia e le atunuu, aua o tatou nei, a o nai o tatou uso ma tuafafine o lo o agai mai foi i le Palemene, o latou taeao. E pei la o le tatou matafaii lau Afioga i le Minisita, sauni nei mo le lumanai o a tatou faiga palota, soia tatou te o soo i tai i le faamasinoga. Fai se tulafono e le toe molia ai, aua ou te iloa o le matou vaega uma lea e i i faapena foi ma i ina, e leai lava ma se isi na oo uma lava i tai. A na le popoto la le isi vaega e fai faatoesega, ia o le mea e tupu, e te i lava ua toe o uma i faiga palota. Ua ou taua le vaega lea lau Afioga i le Minisita. Ou te iloa foi le Tulafono lea e teuteu nei, o au isi faamasinoga lea e fau ai le Tulafono lea, a o lea lava ou te vaai atu, e fau lava le Tulafono, ae emo ifo lava e alu i le faamasinoga. Mo le faataitaiga, se i ou lauga atu ia i le isi mea lapoa lea e i i, o le faatutoatasiina o le Komesina o Faiga Palota, ou te lagolagoina. E manai pe a silasila foi i le umi o lana konekarate, aua afai nei ae pasia le Tulafono lea ma toe tofia le o lo o iai nei, e oo atu i le taimi e fai ai le faiga palota i le 2021, toe tolu vaiaso uma lona term. O lona uiga, na ona uma lava ua uma le term, ia e le iloa pe toe faigaluega pe leai, a o ai la e faaauauina. Se i silasila i ai i le vaega lea pei ona taua i finagalo o nisi o sui usufono.

O le tulaga lava i le faagasologa, o lea ou te vaavaai atu i le tulaga o le Sui Komesina, po o le a le level lea e i ai i le tulaga, aua a fuafua i le vaega o le tatou Ofisa o le Fono, e i ai le Deputy. A silasila foi i le Pule ma Suetusi Sili, e tatau ona i ai le Deputy. Ia po o fea la pe fai se Deputy pe leai, aua a faapea o lea o le a faatulaga i i le Sui Komesina i le taimi pe maliu ai le Komesina, aua tatou te le iloa pe lavea i se taavale, pe te i foi ua oso lona mai fatu po o le leaga foi o ona fatugao, o le mea la lena tatou te le iloa. E le taumasina se isi ma le finagalo o le Atua, ae tatou sauniuni, aua e ui lava ina laitiiti sia foi tamalii, e le o le laitiiti po o le matua e valaau ai agelu i luga i lau afioga, e pei foi o lau Afioga i le Minisita. Ae ou te faamalo mo le Tulafono Tau Faaofi, ou te lagolagoina, ae o nai teuteuga na o lea e tuuina atu, aua a faapea o le a tuuina

atu i le Komiti, ou te iloa o nai teuteuga laiti ia lau Afioga i le Minisita e ono faafaigofie ai le faagasologa ma le tatou matafaioi. Ma lou faaaloalo lava. Manuia le tatou Fono lau Afioga i le Fofoga Fetalai.

Afioga SULAMANAIA FETAIAI TAUILIILI TUIVASA: Faafetai mo le avanoa i lau Afioga i le Fofoga Fetalai. E tulai foi e fai se sao o lenei itumalo ona o le Tulafono Tau Faaofi ua opea nei i le Maota. Ou te lagolagoina lenei Tulafono Tau Faaofi, ou te faafetai ai i le Afioga i le Minisita aemaise foi o le Sui Minisita, aemaise foi o le Ofisa Sili ma le Pulega a lenei Matagaluega o le Malo ua mafai ona aumai lenei Tulafono Tau Faaofi ina ia faatutoatasi ai le Komesina o Faiga Palota. Faafetai lava i le Minisita, e pei foi o lea na malele le Palemia ananei, o le Tulafono lea o le Faavae sa faavae atu e le Minisita o Faiga Palota. O le mea lena sa avatu ai le 250% a le sui usufono mo Salega Sasae ona faapea a ia o le Tulafono a le Toeaina, ae leai o le Tulafono a le Minisita mo Faiga Palota.

E lagolago e le sui usufono mo Vaimauga Sasae le Tulafono ona e le gata o le Minisita o le sui usufono mai Vaimauga, aemaise foi....

FOFOGA FETALAI: Se i tulai mai le sui usufono mo Salega.

Tofa Olo Fiti Afoa Vaai: Lau Afioga i le Fofoga Fetalai, ou te manatu ua leva ona tea le tulaga lea na saunoa i ai le sui usufono mamalu, ae o au e le faapea ou te tetee uma i Tulafono a le Malo. E i ai foi lava Tulafono ou te auai, ae o lea ou te faalogo atu e sao le mea lea e saunoa i ai le sui usufono mo Vaimauga Sasae. Ou te faamalie atu i lau Afioga, toe aveese mai le isi 100% o lau 200% lea na avatu. Ma le agaga faaaloalo.

FOFOGA FETALAI: Tulai mai le sui usufono e faaauau le saunoaga.

Afioga SULAMANAIA FETAIAI TAUILIILI TUIVASA: Lau Afioga i le Fofoga Fetalai, o le mataupu i le Tulafono Tau Faaofi, ou te faafetai i le Minisita aemaise o lana Minisita Lagolago. Na taunuu atu loa le tama lea e Minisita Lagolago vave loa ona tuuina mai le Tulafono Tau Faaofi. O le agaga foi lena o le Malo, ia vave ona tuuina mai nei Tulafono i totonu e tapena i ai tatou, aua o le Matagaluega lava lenei pe a faatumaoti le Ofisa o le Komesina o Faiga Palota, e leai lava se manatu o le sui usufono mo Vaimauga e faaali tele i ai, aua o teuteuga ma mea uma ua tuuina mai, aua nisi sui o le atunuu e agai mai luga. A o tatou, e moni lava o Tulafono ua tatou faatinoina, ae toe lavevea ai foi tatou mo le agai i luma. O lea la ou te lagolagoina ai lenei Tulafono Tau Faaofi.

Na pau lava le talosaga i lau Afioga i le Minisita ma lau Minisita Lagolago, o le tulaga foi lea i le PSC, o lea e i ai le Tulafono lea sa afaina ai foi lenei sui usufono ma so o se sui lava o le PSC e fia tauva i le faiga palota, e tataua ona e faamavae. O le popolega lea e i ai le sui usufono, a e faamavae faamavae ma lou tulaga i lau galuega i le Matagaluega a le Malo ae e le malo, o fea la o le a e alu i ai? Ona e toe foi atu lea i lau Matagaluega ua le fialia le Pule aua foi o lea ua e faamavae. Ia o popolega na o le sui usufono aua o lea e vaai atu i le Matagaluega, sa tataua ona i ai se malosiaga i le faiga palota e taatia ai lea vaega i le PSC, tuusaunoa pea nisi sui o lo o i totonu o Matagaluega a le Malo e omai e fia tauva aua o lea e afifio mai nisi o tamalii o Faauluuluga na fia tauva foi i lenei tulaga tofi, ae o le faalavelave, o le tulaga lea e noanoatia ai ona e tataua

ona e faamavae. E lelei lava la le foi atu a o la e lelei le Pule ma le lua mafutaga, ae a foi atu e matua le fiafia lava le Pule, o fea o le a e agai i ai? Na pau lava lena o se vaega e fia talosaga atu i le Afioga i le Komesina pe mafai ona tuu i ai lea vaega i totonu ina ia tuusaunoa ai pea nai sui ia e fia omai e tauva.

Ia na pau lena o le lagolago a lenei itumalo o Vaimauga Sasae e avatu i le Tulafono a le Minisita ma le Minisita Lagolago aemaise o le Komesina o Faiga Palota.

FOFOGA FETALAI: Malo. Tulai mai le sui usufono mo Falealili Sisifo. Faapuupuu mai saunoaga ina ia mafai ona tali nei mataupu sa laga.

Tofa AUMUA ISAIA LAMEKO: Faafetai i lau Afioga i le Fofoga Fetalai mo le avanoa.

E muamua ona momoli le faafetai ma le faamalo i le Afioga i le Minisita e ona le Tulafono ua mafai ai ona faatutoatasiina le Ofisa o le Komesina o Faiga Palota. Na pau lava se vaega e avatu ai se tuualalo ona i lalo o le Tulafono o lo o i ai le Komiti lea latou te iloilo ina tuaoi o itumalo pe mafai ona silasila e tuu i ai le Loia Sili a le Malo as a compulsory member o le Komiti lea.

O le vaega lona lua lau Afioga, atonu o lea ua manino i le Tulafono o lea ua talafeagai le tolu tausaga lea ua tuu i ai mo le tofiaina o le Komesina e pei foi o le tofiga o le Loia Sili e tolu foi tausaga. A silasila foi la i vaega uma o le Tulafono, o lea ua mafai ona faatutoatasi le Ofisa lenei o le Komesina i le faafaigaluegaina, le puleaina ma le faamaloloina o tagata faigaluega e fuafua lava i le Tulafono Faatonutonu po o Regulations sa faataatia mai e le Matagaluega.

Ia o se manatu puupuu lea o lenei itumalo e lagolago ai le Tulafono Tau Faaofi ua taatia i lumamea nei. Faafetai.

FOFOGA FETALAI: Malo faafetai saunoa. Ia, tulai mai le sui usufono mo Faleata Sisifo ona tali loa lea o le Malo i le Afioga i le Minisita.

Tofa LEALAILEPULE RIMONI AIAFI: Faafetai i lau Afioga mo le avanoa. Faafetai foi i le Afioga i le Minisita ma le Matagaluega mo lenei Tulafono Tau Faaofi.

O le Tulafono lenei o Faiga Palota, faatoa aumai lava pe a toe fia masina pe tolu, fa masina fai le faiga palota, ona o le mautinoa ai lava lea o sui usufono, confused i tausaga taitasi. Ae faafetai o lea ua vave mai ma lava le taimi tatou te tapena ai ma i ai nai suiga talafeagai a o lumanai ai le isi faiga palota.

E fia fai lava se manatu i le Tulafono Tau Faaofi lenei ona o le taua tele, lea sa laga foi e se tasi o sui usufono matua o le Maota. E faigata ona malamalama tele i ai sui usufono e le i oo i le faamasinoga, a o sui ia e faamasino pea i faiga palota, o au e le i misi se faiga palota. Ae na pau lava le mea o le malo ai foi, malo soo. E le lelei, e le talafeagai. A tatou vaai i lalo i lalo o galuega faatino a le Komesina, o lena e pito lava i luga i lana matafaioi le filifiliina o sui usufono mamalu o le Palemene. O lona uiga ua tataua ona ia te ia le malosiaga atoa e taofi ai le tagata e le tataua ona agavaa ma ave ai le ioega e tauva ai le sui usufono e tataua ona tauva. Sa fai lelei le matou submission i le mea lea i le Komisi, ave i ai le matou... sa matou fai manatu i ai i le vaega lea. O se mea le talafeagai tele le sue fua e le isi sui tauva o le isi sui tauva i lona agavaa, a o le galuega patino lea e tataua ona fai e le Komesina o Faiga Palota. Afai ae i ai se

sui e le fiafia ai, o lona uiga e tatau ona agai lana sue i le Komesina o Faiga Palota. E le tatau ona... o lea e matua tele le afaina talu ai, ua oo ai ina fevaevaeai nisi o afioaga ma nisi o sui tauva, ae le o se mea lea e tatau ona tupu. Ou te le iloa foi po o le a le mea na ala ai ona sui, a o le isi faiga palota muamua sa ou tauva ai i tua atu ma isi, o le matafaioi lava lea a le Komesina e fai, a alu atu lava e le faamalieina le Tulafono, taofi ai i ina, e le mafai ona e alu i le faiga palota, uma. Ae tatau ona toe tagai lau Afioga i le Minisita i le vaega lea, ina ia taofia lea vaega ae faatino le galuega a lau Matagaluega e tatau ona fai.

Lona lua lau Afioga, o le mea lea na sui ai le term a le Suetusi Sili a le Malo lea ua tuu tai ono tausaga, o le isi mau maumaututu na ala ai ona faaono tausaga, ina ia overlap, ia ova atu i le term o le Palemene, ia aua ne i i ai se aafiaga faapolokiki. O le mea foi lea e tatau ona i ai, i lou talitonuga term o le Komesina o Faiga Palota. E tatau foi ona tuu tai ono tausaga i lou talitonuga, ina ia aua ne i i ai se aafiaga, ma ia lava ai lona taimi e tapena ai le faiga palota mai le isi palota i le isi palota. Ae le gata i lea, ia matua manino, e tatau ona i ai se Sui Komesina, Deputy, e galulue faatasi i le faiga o le mea lenei, ia aua ne i faatutusa ma isi Matagaluega a le Malo. Ma o le mea foi lea ua ou vaai ua toe agai i ai le Komisi o Galuega a le Malo ma toe vaavaai vaega ia i Sui Pule, ua le work foi lea mea na fai, ua abuse tele lea mea ua fai nei, ua tai 20 ACEOs a isi Matagaluega a ua leai ni mea e faia. Ae manaia le toe faamanino o le Tulafono Tau Faaofi e fesoasoani ai i le tatou Tulafono mo le agai i luma. Ia o nai manatu ia ma le faaaloalo lava. Faafetai.

FOFOGA FETALAI: Malo faafetai. Ia tulai mai le sui usufono mo Faasaleleaga Nu.2.

Afioga PAU SEFO TAUMATA PAU (Faasaleleaga Nu.2): E momoli atu lau lagolago i lenei Tulafono Tau Faaofi. Faafetai foi i le Afioga i le Minisita e tusa ai ma le Tulafono. A o nai fautuaga ia pei foi ona faalogologo atu i nisi o saunoaga i le agai lea pe a mea le faiga palota i le faamasinoga. Ma e le po ma e le lilo foi o lenei sui usufono ua molia faafa i le faamasinoga, ma ou te talitonu foi e leai se malosiaga tele foi o le Minisita ma le Komesina o le a tutoatasi e foia ai lea mea o le o i tai i le fale faamasino pe a uma faiga palota. A o lo o faafogafoga mai foi si ou itumalo, na amata lava ona ou sau lava i lenei tofi o faamasino lava, e oo mai lava i le taimi nei sa molia lava au i le Tulafono ona o mea foi nei e le mafai ona le talia le mea e manao ai.

Na pau lava le fautuaga i lenei Tulafono Tau Faaofi, o le a le mea... a uma loa le molia faafa, ona faataga loa lea o le sui usufono e sa ne i toe molia pe afai e sao mai i le isi faiga palota o lo o sosoo ai, ina ia taofia ai ona fai lea tulaga o le faamoemoe e molia tagata. A leai i le fa, ia po ua lava foi le lua ona faataga loa lea ma e le toe mafai ona toe molia. Aua ana i ai lena Tulafono i lena taimi, masalo pe na o le faalua lava ona molia au e le toe moliaina au e oo mai i le aso lenei ma lenei Paeaiaga.

Ia o se fesoasoani atu lena i lenei Tulafono Tau Faaofi, ae lagolago e lenei sui usufono le Tulafono e pei ona aumai i luma o le Laulau a Fono.

FOFOGA FETALAI: Malo. E manaia le faalua ae leaga le faafa ua tele foi le fa. Ia, tulai maia lau Afioga i le Palemia.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI:

Lau Afioga i le Fofoga Fetalai e i ai nai mataupu ia sa laga o mataupu e aofia ai faiga faavae a le Malo e tatau ona ou tali atu i ai. Ma o faiga faavae nei e agai i tua atu o le Paeaiga lenei. O le taua ia o finagalo faaalua, e taua tele, ma le isi mea e faataua ona o le tatou Tulafono e alu i le Komiti o Tulafono Tau Faaofi, e tele lava la le taimi e tagofia ai finagalo ia ua aumai, ona o finagalo e aofia uma ai tatou ma e anoa tele sao ua faatino i le aso i le auala e tuuitiitia ai lenei mea o le felauai i luma o le faamasinoga.

A o lou tulai atu ona o lea sa matua fesiligia lava le tulaga po o le a tonu lava le uiga o le tutoatasi. E tatau ona tutoatasi le Matagaluega. O le mea lenei o le tutoatasi i le faasolo maiga o le Malo, sa leai ni Matagaluega e tutoatasi, sa i lalo uma lava o le Pulega a le PSC, le Komisi e Pulea Galuega a le tatou Malo, i luga o le talitonuga o i lea e alu atu ai faiga faavae e faalauaugatasia uma ai Matagaluega. A ua alu alu alu, i luga o le faagaulemalie o nisi o Matagaluega, ae na amata atu i le Matagaluega lenei a le Maota Fono, i le tulaga foi lenei ua le mafai ona ioe mai le PSC i nisi o talosaga mo tagata faigaluega e moomia. Muamua, lua, ma o latou totogi e tatau ona sii maualuga, ae taofiofi pea le PSC i lena taimi. O le vaaiga a le PSC, e leai se mea o le a fai faapitoa ai se Matagaluega e tasi, e tatau ona mulimulitui pea i luga o le fua faatatau o mea nei o totogi e vasaga lelei ai totogi o tagata faigaluega.

O lona lua, e tatau lava ona tasi le Pule e matua iloilo totoa ai le taua ma le le taua o se talosaga, aua o le agaga lava lea na tupu ae i le Faauluuluga o le Matagaluega a manao loa e hire nisi hire, ae ono faigofie lava ona faatino e i latou o lea e galulue. A o le faalavelave, e pei e i ai le tulaga augata e toe faatulaga tiute, toe tufa tiute i totonu o le aufaigaluega o lo o i ai e oo mai lava la i le taimi lenei. Mo sina faaitaiga; ina ua faatu le vaega lea e vaaia mea nei o tatou Faalapotopotoga foi nei tumaoti, e toalaiteiti lava e na faia le galuega i le Ofisa o Tupe, na ona faatu lava fefete loa ma le Matagaluega, ua tele tagata, faitau miliona ma miliona le budget. E oo foi la i le SQA, na manatu lava e toalaiteiti tagata e tatau ona faatino. A o le a le mea ua tupu? Oka oka e se Faalapotopotoga. E te ofo ai po o a latou galuega o fai. A o le uiga ia o CEOs, o mea o empire builders. E tu loa le CEO manao e matua faafefete le organisation. A o le fesili; o faaoga tatau le aufaigaluega? A suesue manino i ai, e le o faaogataatua. O mea ia sa matua faaeteete i ai faigamalo ma le PSC. Ae talu ai o le talosaga na alu atu i nei i le Maota Fono o lea e i ai le Pule, pei o i ina lea na gau ai le finau a ua alu atu i se tulaga foi lea faamalosi.

O le ala foi la lena i le taimi na faatulai mai ai le Tulafono o le NPF i le matua tele o tetee i le taimi lena. O au le isi sa aafia i le taumafaiga ina ia talia le Tulafono a o ou galue ai i le Matagaluega o Tupe i le 1972, ae tasi lava le mea e ono le pasia ai le Tulafono, o le pule a le Palemene, le pule a faipule. A o faipule, e matua le fiafia lava i nei mea o le toesea o tupe e fai ai latou NPF. O le a la le mea na tupu? Na fai ai loa lea o le aiaiga faapitoa, na o faipule lava a uma loa le latou taitolu tausaga tala i tua le NPF. Ia lena la na faigofie ai ona pasi. Aua foi e tuuloloa a isi seiloga e le tai 55 tausaga, a o faipule, e tolu a tausaga, le mea o lo o i ai le power. I lou lava taofi, o uiga foi na sa fai i na onapo, lea na faigofie ai ona pasi le Tulafono. O le a la le mea ua tupu? Ua fiafia lava faipule e uma le tolu tausaga tala atu NPF o fai ai a latou faatosina, tele ai ma faamasinoga mulimuli ane, ia, o isi tootutuli i isi. Lea la e sao ai le tala a le faipule lea na fai nei i le taeao, o le popoto o isi e faatoese, lea na le oo

ai i tai i le faamasinoga. A o ai e faia ia mea? O tatou lava o faipule. Ona oo loa lea ina mafaufau mafaufau, se i fofo le mea lea, o le tulaga foi lea o le mataga o le mea lea e i ai, tala i tua i le faaiuga o le tolu tausaga, tala i tua i le tolu tausaga o fai ai oo. Ona fai ai loa lea o le iuga a le Vaega lenei, e mataga tele lenei mea o le uma atu o le tofi faipule.. Ou fesili atu i le isi faipule, o le a alii lau mea o fai nei, o lea ua e le toe faipule? Ae fai mai le sui lea o Lufilufi, oi o le a foi se mea, o lea ua ou ola i le tootoo. Ou fai atu, 'se i faamatala mai ou te fia malamalama o taua uma o Lufilufi?' Fai mai, 'e oo loa i le taeao ua uma ona fai lau meaai ou tago loa i lou tootoo ma lou fue, fai loa lou laei ou tago atu to mai le mea foi lea o le siapo, ia ona ou valaau loa lea i le taxi ou alu i Mulinuu. Ia na ona uma lava o lea faamasinoga tu ma lou tootoo.' Ia o lea la ua ola i le aisi. Mataga tele mea na fai e faipule i na ona po. Ia ona saunoa mai lea o Tofilau i le matou Vaega, tatou faia ia se mea se i litaea atu ai faipule, ona maua ai lea o se mea e litaea ai. O lea la e fai ai nei le tatou penisione. Ua ou faamatala atua le taua o le mea lea. Ua oo loa i le taimi e tala ai le penisione, ia, ae tau mai le mea, ua tala uma lava i tua penisione, ae toe toalua lava faipule ia e totoe e le i talaina i tua penisione, toe o au ma le isi Minisita o lau Kapeneta. Ia ua toe alu alu alu, toe oo i le taimi lona lua, toe tala uma foi. O lea la ou te manatunatu o le a tamau ina ia aua ai ne i toe o i tua, ina ia aua ai ne i toe o e faalavelave i faamasinoga a tagata i Mulinuu, le mea lea o le faipule ae aisi.

O le tulaga lea na mafua ai lea ou te faamatala atua le mea lea lau Afioga i le Fofoga Fetalai, o mea o faaiuga fai i le taumafai e faataoto faavae ina ia aloaia ai faiga faavae mo le agai atu i le lumanai, lea la na taoto mai ai le tutoatasi. O lea la ua tutoatasi lea Ofisa, tutoatasi foi leoleo, a o le tala la, o le fesili; o aoga la lea tutoatasi? O le tali, o le tala a le Tusi Oti, e matua leai lava ma se aoga. Aisea? Aua foi o lea ua taoto le tulaga o le vasaga o totogi, o lea ua taoto. E le mafai ona pule lava la outou Matagaluega ma soona ta sii totogi, e matua leai lava ma se aoga o le mea lea o le tutoatasi. O lea ua taoto. Lona lua, e faapefea tofiga, e tatau ona faatalitonuina le Matagaluega o Tupe pe tatau ia tofiga, ma faatalitonuina le Kapeneta. O lona uiga o lenei mea o le tutoatasi, ioe o lea ua tutoatasi, a o le tala i le Tusi Oti. O lea ua agai le Kapeneta i mafauauga nei, atonu o le isi lea Reform tele o lo o faamalumalu mai, ina ia toe teuteu ia tiute fai o le PSC, agai latou i le tulaga o le training, ae alu le tausaga o pisi ai i le faatinoina o aoga tau Pulega, ia malamalama lelei tagata faigaluega i o latou tiute. A o le mea lea o le tofiga ma le faatulagaina o totogi, o lea ua i ai le tatou Tribunal e faatulagaina totogi. E leai se mea e toe oo fua i ai le PSC. A o i foi la i le tofiga o le tagata, gafa pea le pulega a le Matagaluega latou te faatino mea ia, fuafuaga ia o lea ua taoto nei, ua amata faatalanoa e le Kapeneta. Ma o le isi lona Reform tele lea e faamalumalu mai luga, e leai se isi taimi e faatino ai mea ia, Paeaiga a le Palemene lenei e faatino ai mea faigata nei, mea e ono aafia ai le Teuteuga o le Faavae. Lau Afioga i le Fofoga Fetalai, o le tulaga lona, a o lea lava ua aumai e faatutoatasi pea i lenei taimi. I le tulaga o le agai i le lumanai, e i ai lava e faatino ia Teuteuga ia ona sologa lava lea i le lautuatonu ia le faamoemoe.

O le vaega lona lua, o le fesili lea na aumai i le faamavae. E tasi lea faiga taua na faataoto e le Kapeneta, i tua atu ae le i afio mai le Afioga i le Minisita o lo o i ai nei, o le ala lea o lou tulai atu ai, leaga o faiga faavae a le Malo. O le tulaga o mea nei o le faamavae o le sui ae le tatau ona toe alu i le faiga palota. Ni a fa, ae toe foi mai le sui lona ae galue i totonu o le PSC ae talosaga atu se isi o le nuu o le isi sui sa la tauva, pe alu atu se isi o le uso o le sa lua tauva, ua

tele mea faapena ua tutupu, e faaoga loa i i le tulaga o le fai ma se e tau i ai. O le Malo lenei, o lo o taumafai lava le Kapeneta ina ia tau faatonutonu ia vaega e ono sao mai ai, ia le faailoga tagata. Lau Afioga i le Fofoga Fetalai, o le itu lena ou te toe faamanatu atu, o lea tatou te i ai i le tulaga aoao, a uma ona see atu lea o le tulafono lenei i le Komiti latou te iloiloaina, ma e ono tele lava ia ni teuteuga e aumai e latou nei sa sausaunoa, leaga e taua uma lava manatu ia na aumai nei. E toe tilotilo i ai le Komiti ona aumai ai foi lea i le vaitele lenei e tatou te soalaupule ai ma faatino le teuteuga ua tataua ma talafeagai.

Lau Afioga i le Fofoga Fetalai, o le faamalamalamaga lena o le vaega tau faiga faavae o le Malo e pei ona aumai ai le fesili.

FOFOGA FETALAI: Malo faafetai. Pe i ai se isi faaopoopoga lau Afioga i le Minisita...

Afioga Hon FAAOLESA KATOPAU T. AINUU: Lau Afioga i le Fofoga Fetalai, o lena ua tali atu le Palemia i mataupu sa laga e sui usufono. Ma le faaaloalo lava.

Na faamaonia le lafo ma faitauina le Tulafono Tau Faaofi o le Komisi o Faiga Palota 2018 i lona faitauga faalua.

FOFOGA FETALAI: E pei lava ona saunoa le Afioga i le Taitai o le Malo, o le finagalo lava o le Malo ia faapena ona maua avanoa e sui usufono mamalu, o le mafuaaga lena ua finagalo ai le Malo.

E tusa ai ma tatou Tulafono Tumau, o le a tuuina atu le Tulafono Tau Faaofi i le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae mo le iloiloaina ma toe lipoti mai i le Fono Aoao i le Fonotaga e sosoo ai.

E tele avanoa e mafai ai ona maua ai e sui usufono e toe faaali ai nisi finagalo, e ala i le tuualalo ma le fautuaga.

Talu ai ona o lea ua tatou taunuu i le tatou taimi manava o lenei aso e faamuta ai la tatou galuega ma siui o le Fonotaga. Ua i ai le manatu o le a faaiu le tatou Fonotaga i le tatalo e saunia mai e le sui usufono mo Falealili Sasae.

Na tolopo Taualumaga a le Fono Aoao i le itula e 12:54 i le aoauli, seia aulia le itula e 9:00 i le taeao o le Aso Faraile, 23 Mati 2018.